




Von Kauffshandlung vnd wucher.

<https://hdl.handle.net/1874/431506>



Von Kauffshandlung und wucher.

Mart. Luther.

1 5 2 5

THE
LIBRARY OF THE
MUSEUM OF
COMPARATIVE ZOOLOGY
AND ANATOMY
HARVARD UNIVERSITY
CAMBRIDGE, MASS.



Als heylig Euangelion:

nach dem es an den tag komen ist / strafft vnd zeigt allerley werck der finsternuß / wie die sant Paulus nennet Roma. 13. Den es ist ein helles licht / das aller welt leucht vnnnd leret / wie böse die werck der welt seind / vnd zeiget die rechte werck so man gegen Gott vñ den nechste üben sol. Daher auch etliche vnder den kauffleuten aufferwacht vnd gewar worden sind / dz vnder irem handel manch böser griff vñ schedliche finanze im brauch sind / vñ zu besorgen ist / es gehe hie zu / wie der Ecclesiasticus sagt. Das kauffleut schwerlich on sünde sein mügen / Ja ich achte es treffe sie der spruch S. Pauli. 1. Timoth. vlt. Der geiz ist ein wurzel alles üfels. Vnd aber mal / Wölche reich wöllen werden / die fallen dem teuffel in den strick vñ in vil vnnütze schedliche begirde / welche die leut versencken ins verderben vnd verdammis.

Wie wol ich aber dencke / diß mein schreiben werde fast vñ sunst sein / weil der vnfall so weit eingerissen / vnd aller ding überhand genomen hat / in allen landen. Dazu die jenigen / so das Euangelion verstehen / selbst auß eigenem gewissen wol künden vrtelsen / in solchen eüsserlichen leichten sachen / was billich vnd vnbillich sey. Bin ich doch ermanet vnd gebetten / solche finanze zu rüren vnd etliche an den tag zu bringen / ob ye der hauffe nicht recht wölle / das doch ettliche / wie wenig auch der selben sey / auß dem schlund vnd rachen des geizs erlöset wurden / Den es muß ja so sein / das man noch etliche finde vnder den kauffleuten so wol / als vnter ander leuten / die Christo zugehören / vnd lieber wolten mit gott arm / denn mit dem teuffel reich sein / wie der 36. Psal. sagt. Es ist dem gerechten besser ein wenig / denn grosse güter der gottlos

fen. **N**olan umb der selben willen / müssen wir reden.

Das kan man aber nicht leücken / das kauffen vnd verkauffen ein nöttig ding ist / des man nicht emperen / vnd wol Christlich brauchē kan / sonderlich in den dingen / die zur not vnd ceren dienen / Den also habē auch die Patriarchen verkaufft vnd gekaufft / vich / wolle / getreide / butter / milch vnd ander güter / Es send gots gaben / die er auß der erden gibt / vnd vnter die menschen teylet. **A**ber der außländische kauffs handel / der auß Kalikut vnd Indien vnd der gleichen wahr her bringe / als solch kostlich seyden vnd goldwerck vnd wärz / die nur zur pracht vnd keinem nutz dienet / vnd land vnd leuten das gelt auß saugē / solt nicht zügelassen werden / wo wir ein regiment vnd fürsten hetten. **D**och hie von wil ich jetzt nicht schreiben / den ich acht / es werde zü letst / weñ wir nimer gelt haben / von jm selbst ablassen müssen / wie auch der schmuck vnd frasz / Es wil doch sunst kein schreibē noch leren helfen / bis vns die not vnd armüt zwingē.

Gott hat vns teütschen dahin geschlaudert / dz wir vnser goldt vnd silber müssen in frembde länder stoffen / alle welt reich machen / vnd selbst bettler bleiben / Engeland solt wol weniger golds haben / wenn teütsch land jm sein tüch lieffe / vnd der künig von Portigal solt auch weniger haben / wenn wir jm seine wärz lieffen / Rechen du / wie vil gelts ein Mess zü Franckfurt auß teütschem land gefürt würt / on not vnd vrsach / so wirstu dich wundern / wie es zü gee / das noch ein heller in teütschen landen sey / Franckfurt ist das silber vnd goldt loch / da durch auß teütschem land fleüßt / was nur quil let vñ wechset / gemünst oder geschlagen wird bey vns / **B**ere das loch zügestopfft / so dürfft man jetzt der slag nicht hören /

3.

wie allenthalben eytel schuld vnd kein gelt/alle land vñ stede mit zinsen beschwäret vñ außgewüchert sind. Aber laß gen/es wil doch also gen/**W**ir teütschen müssen teütsche bleiben/wir lassen nicht ab/wir müssen deñ. Wir wöllē hie von mißbrauch vñ sündē des kauff handels redē/so vil es dz gewissen betrifft/Wie es des beütels schaden trifft/laffen wir fürsten vnd herrn für sorgen/das sie ir pflicht daran aufrichten.

Erstlich haben die kauffleüt vnter sich ein gmeine regel/das ist ir hauptspruch vñ grund aller finanzen/da sie sagen/Ich mag mein war so thewer geben als ich kan. Das haltē sie für ein recht/da ist dem geys der raum gemacht/vnd der hellen thir vnd fenster alle auffgethan/Was ist das anders gesagt/deñ so vil/**I**ch frag nichts nach meinem nechsten:Hette ich nur meinen gewinn vnd geys vol/was get michs an/das es zehen schadē meinem nechsten thet auff ein mal:**D**a sihestu/wie diser spruch so stracks vnuerschampt/nicht allein wider die Christliche liebe/sonder auch wider das natürliche gesez feret. Was solt nu güts im kauff handel sein:wassolt on sünde sein/wo solch vnrecht das hauptstück vnd regel ist des ganken handels:Es kan damit der kauff handel nichts anders sein/deñ rauben vñ stelen den andern ir güt.

Deñ wo das schalcks auge vnd der geys wanst hie gwar wird/das man seine war haben müß/oder der käufer arm ist vnd sein darff/da macht ers im nus vnd theür/**D**a sihet er nicht auff die würde der war/oder auff den dienst seiner mühe vnd far/sonder schlecht auff die not vnd darbe seines nechsten/nicht der selben zū helffen/sonder der selben zū seinem genies zū brauchen/seine war zū steygern/die er sunst wol vngesteygert ließe/wo des nechsten not nicht da were/

Und muß also durch seinen geys/die war so vil mer gelten/
so vil der nechst grösser not leydet/das des nechsten not gleich
der war schaz vnd würde sein muß. **S**age mir/heist dz nicht
vnchristlich vñ vn menschlich gehandelt: würt daselbst nicht
des armen not jm selbst mit vnter verkaufft: **D**eñ weil er sei
ner not halben die war dester theürer nemen muß / ist eben
so vil/als das er muß seine not erkauffen / **D**eñ nicht die lau
ter war jm verkaufft würt/wie sie an ir selbst ist / sonder mit
dem zusatz vnd anhang / dz er der selbige benötigt ist. **S**ihe/
diser vnd der gleichen greuel muß folgen / wo dis recht geet/
Ich mag mein war so teür verkauffen/als ich kan.

Is solt nicht so heissen/**I**ch mag meine war so theür ge
ben/als ich kan/oder will/**S**onder also/**I**ch mag mein war
so theür geben / als ich sol oder als recht vnd billich ist. **D**enn
dein verkauffen soll nicht ein werck sein / das frey in deiner
macht vnd willen / on alle gesetz vnd maß stehe / als werestu
ein gott/der niemandt verbunden were / **S**onder weyl solch
dein verkauffen ein werck ist/das du gegen deynem nechsten
übest/sol es mit solchem gefah vñnd gewissen verfasst sein/
dz du es übest on schaden vnd nachteyl deines nechsten/**U**nd
vil mer acht haben/das du jm nicht schaden thüst / denn wie
du gewinnest. **J**a wo seind solche kauffleüt: **W**ie solt der
kauffleüt so wenig werden / vñ der kauffs handel abnemen/
wo sie dis böse recht wurden bessern/vnd auff **E**hrliche bil
liche weise bringen.

So fragstu denn/**J**a wie theür sol ichs deñ geben: **W**o
treff ich das recht vnd die billigkeit/ das ich meinen nechsten
nicht übersehe oder überneme: **U**ntwurt. **D**as würt freilich
mit keiner schrifft noch rede nimer mer verfasst werden/ **E**s

hats auch noch niemant fürgenomen / ein jeckliche war zů
setzen / stettern oder nidern. **V**sach ist die. Die war ist nicht
alle gleich. so holet man eine ferier denn die ander / geet auff
eine mer kosten / denn auff ein andere / das es hie alles vnge
wis ist vnd bleiben muß / vñ nichts gewisses mag gefest wer
den / so wenig als man ein eynige gewisse stadt setzen mag /
da man sie alle her holet / oder gewisse kost stymmen die dar
auff geet / **S**yntemal es geschehen mag / das einerley war /
auff einerley stadt / auff einerley strasse / hewr mer koste / deñ
vor ein jar / das villeicht der weg vñnd wetter böser ist / oder
sunst ein zůfall kompt / der zů merer vnkost dringt / denn auff
ein ander zeit. **N**u ist's aber billich vnd recht / das ein kauff
man an seiner war so vil gewinne / das seine kost bezalet / sei
ne mühe / arbeit vnd fah: belonet werde / Müß doch ein acker
knecht fäter vnd lon von seiner arbeit haben / Wer kan vmb
sunst dienen oder arbeyten? **S**o spricht das Euangelion /
Ein arbeiter ist seines lons werdt.

G Doch das wir nicht gar darzů schweigen / were das die
beste vnd sicherste weyße / das weltliche oberkeit hie vernünfft
tige / redliche leüt setze vnd verordnete / die allerley war über
schlügen mit irer koste / vnd setzten darnach das mas vnd zil /
was sie gelten solt / das der kauffman künd zůkomen / vnd sei
ne zimliche narung dauon haben / wie man an etliche orten /
wein / fisch / brot vnd des gleichen setz. **A**ber wir teütschen ha
ben mer zůthün / zů trincken vnd zů tanken / das wir solchs
regiments vnd ordnung nicht künden gewarten. **W**eil denn
dise ordnung nicht zů hoffen ist / ist das der nechste vnd beste
radt. **D**z man die war lasse geltē / wie sie der gemein marckt
gibt vnd nimpt / oder wie lands gewonheit ist zů geben vñnd
zů nemē / **D**eñ hierinne mag man dz sprichwort gen lassen /

Ehū wie ander leūte / so nārestu nicht. **W**as solcher weiße
gewonnen wūrd / acht ich redlich vnd wol gewonnen / Syn-
temal hie die far stehe / das sye zū weilen an der war vnd kost
verlieren müssen / vñ sich nicht allzū reich gewinnē mūgen.

Wo aber die war nicht gefest / noch geng vñnd gebe ist /
vnd du solt vnd müst sie sehen zum ersten / Warlich hie kan
man nicht anders leren / man müß dirs auff dein gewissen
heim geben / das du zūsehest / vnd deinen nechsten nicht über-
nemest / vnd nicht den geys / sonder deine zimliche narung sü-
cheest. **E**s haben etliche hie wellen maß sehen / das man müge
an aller war die helffte gewinnen / etlich das man müge das
dritte teyl gewinnen / Etliche auch anders. **A**ber der ist keins
gewis noch sicher / **E**s were deñ von weltlicher oberkeit vnd
gemein recht also verordnet / **W**as die selbige hierinn setze /
das were sicher / **D**arumb müstu dir fürsēhen / nichts denn
deine zimliche narung zū süche in solchem handel / darnach
kost / mühe / arbeit vnd far rechnen vnd überschlagen / vnd also
denn die war selbst sehen / steygern ode: nidern / das du solch
er arbeit vnd mühe lon dauon habest.

Ich will aber hie das gewissen nicht so ferlich gefangen
noch so eng gespannen haben / als müst man dz maß so eben
treffen / das nicht vmb einen heller solt felen / **D**eñ das ist nit
müglich / das du so eben treffen soltest / wie vil du verdienet
habest / mit solcher mühe vnd arbeit. **E**s ist gnüg / das du mit
güttem gewissen darnach trachtest / das du gern das rechte
mas treffest / vnd doch des handels art ist / das nicht müglich
ist zū thūn / **E**s würt der spruch des weisen auch an dir wol
war bleiben / **E**in kauffman mag schwerlich on sünd han-
deln / vnd ein freymar wūrd schwärlich gerechten mund be-
halten.

S.
halten. Ob du nun ein wenig zu vil nemeſt vnwiſſend vñ
vngerne/ſo laß d; ſelb ins vatter vnſer faren/da man bettet/
Vergib vns vnſer ſchuld. Iſt doch keins menſchen leben on
ſünde. Auch ſo kompts wol widerumb/d; du für deine mühe
etwa zu wenig nemeſt / da laß in die wette ſchlahen/vñ ge-
gen ander auff heben/wo du zu vil genommen haſt.

Als weiß du einen handel hetteſt / der des jars auff hun-
dert gulden lieffe/vñ du über alle koſten vñ zimlichen lon/
den du für deine mühe / erbeit vñ fahr dran gewinneſt vñ
nemeſt/vngederlich ein gulde zwen oder drey zu vil gewinſt/
das heiß ich hie den feyl im handel/den man nicht wol mey-
den kan/ſonderlich ſo zu handeln ein jar lang. Darum ſoltu
dein gewiſſen damit nicht beſchweren/ſonder als eine ander
vnüberwindliche ſünde/die vns allen anhangen/ mitt dem
vatter vnſer für gott bringen vñ im beſelhen/Deñ zu ſolch
em feyl dringt dich die not vñ art des wercks/nicht der mü-
wille vñ geys/ Deñ ich rede hie von den gütherzigen vñnd
gotsfürchtigen menſchen/die nit gern vnrecht thetten/gleich
wie die Eliche pflicht nicht on ſünde geſchicht/vñ doch gott
vmb der not willē/ſolchem werck durch die ſinger ſihet/weil
es nicht anders ſein kan.

Wie hoch aber dein lon zu ſehen ſey/ den du an ſolchem
handel vñ erbeit gewinnen ſolt / kanſtu nicht beſſer rechnen
vñ abnemen / deñ das du die zeit vñ gröſſe der erbeit über-
ſchlahet / vñ nemeſt ein gleichnuß von ein gemeinen tag-
löner/ der ſunſt etwa arbeitet / vñ ſihet/ was der ſelb einen
tag verdienet/darnach rechne/wie vil tage du an der war zu
holen vñ zu erwerben dich gemühet / vñ wie groſſe arbeit
vñ fahr dartinne geſtanden haſt / Deñ groſſe arbeit vñ

vil zeit / sol auch deste größern vnnnd mehr lon haben / Mehr
vnd besser vnd gewisser kan man in diser sachen nicht reden
noch leren / Wem das nicht gefelt / der machs besser. Mein
grund steht / wie gesagt ist im Euangelio / das ein arbeiter
seins lons wert ist / Vñ Paulus auch spricht. 1. Cor. 9. Wer
des vichs hüt / sol der milch genießsen. Wer kan auff eigē kost
vnd sold reysen. Hastu bessern grund / gan ich dir wol.

Zum andern ist noch ein gemein feyl / welcher nicht allein
vnter den kauffleuten / sonder auch in aller welt ein leüffige
gewonheit ist / dz einer für den andern bürg würt. Vnd wie
wol das selbig werck scheinert on sünde / vñ ein tugent der lie-
be zü sein / so verderbet es doch gemeincklich vil leüt / vñ bring-
get sye zü vnüberwintlichem schaden. Der künig Salomon
hat solchs manigfeltig verbotten vnd verworffen in seinen
sprüchen / vnd spricht am. 6. cap. Mein kind / bistu für deinen
nechsten bürg worden / so hastu deine hand verhefftet / Du
bist verknüpfft mit der rede deins munds / vñ gefangen mit
der rede deines munds / So thü doch mein kind also / vnd er-
rette dich / dē du bist deinem nechste in die hend komē / Lauff
eyl / vnd treyb deinen nechsten / laß deine augen nicht schlaf-
fen / noch deine augenlid schlummern / Errette dich wie ein
rehe von der hand / vnd wie ein vogel auß der hand des vog-
lers. Item cap. 20. Nim dem sein kleid der für einen andern
bürg werd / vnnnd pfende in vmb des frembden willen. Item
cap. 22. Sey nicht bey denen die ir hand verhefften / vnnnd für
schuld bürg werden. Vnnnd abermal am. 27. Nim dem sein
kleid / der für ein andern bürg würt / vnnnd pfende in vmb des
frembden willen.

Sihe da / wie der weys kōnig in der heyligen schrifft so

G.

hart vnd hefftig verbeit / für andere bürg zu werden. Auch
stimet mit im das teütsch sprichwort / Bürgen sol man würz
gen. Als solts sagen / **E**s geschicht dem bürgen recht / das er
gewärget würt vnd zalen müß / denn er thüt leichtfertig vnd
thörllich daran das er bürge würt. **A**lso das solchs nach der
schriffte beschlossen ist / das niemant sol für andere bürg wer
den / er vermüg es den / vnd sey volligs willens selbst schuldig
zu sein vnnnd bezalen. **N**un scheinert es wunderlich / das solch
werck böß sey vnnnd verworffen / **D**ann das es ein thörllich
werck sey / haben gar vil selbst erfahren / die das hauptkraken
dauon kriegen haben. **W**as ist den die vrsach dz verworffen
würt? **D**as wellen wir sehen.

Es ist bürg werden ein werck das ein menschen zu hoch
ist / vnd nicht zugepürt / vnd greiffet mit vermessenheit in got
tes werck. **D**enn erstlich / so verbeit die schriffte / man sol kei
nem menschen trawen / noch sich auff in verlassen / sonder al
lein auff gott / **D**en menschlich natur ist falsch / eyttel / lugen
hafftig vnd vngewis wie die schriffte sagt / vnd auch die erfaz
rung täglich leret. **W**er aber bürg würt / der trawet einem
menschen / vnd setz sich mit leyb vñ güte in die far / auff einen
falschen / vngewissen grund / darumb geschicht im recht / das
er falle vnd feyle / vnnnd in der far verderbe. **Z**um andern / so
trawet er auch auff sich selbst / vnd machet sich selbst zum got
(**D**enn warauff ein mensch trawet vnd sich verlest / das ist
sein gott) **N**un er aber seins leybs vnd güts kein augenblick
sicher vnd gewiß ist / als wenig als des / für den er bürg würt /
sonder steet aller in gottes handt allein / der nicht haben wil /
das wir ins künfftige ein harbreit macht oder recht haben /
vnnnd des kein augenblick sicher vnnnd gewiß sein sollen / so
thät er vnchristlich / vnnnd geschicht im recht / weyl er das

versetzt vnd zusagt / das nicht sein noch in seiner macht / son-
der in gottes henden allein stehe.

Also lesen wir Gen. 43. vnd 44. wie der Erkuatter Ju-
da / für seinen brüder Ben Jamin bürg ward / gegen seinem
vatter Jacob / das er in wolt wider bringen / oder wolt selbst
ewigklich schuldig sein. Aber gott straffte die selbe vermessen-
heit sein / vnd lies in sincken vnd seylen / das er Ben Jamin
nicht künd wider bringen / bis er selbst sich für in gab / vñ den
noch auß gnaden kaum loß ward. Vñnd in geschach recht /
Den solche bürgen thun gerad / als dürfftē sye gott nicht ein-
mal darumb grüssen / oder dencken / ob sye irs leibs vnd güts
auch morgen gewis seyen / vnd handeln so gar on forcht got-
tes / als hetten sye das leben vnd güte von in selbst / vnd werens
mchtig wie lang sie wolten / welchs nicht anders ist / den ein
frucht des vnglaubens. **B**ie auch Jacobus in seiner epistel /
solchs cap. 4. für einen hochmüt schilt vñ spricht / Wolan die
ir nu saget / Heütte oder morgē wöllē wir ziehen in die oder
die stadt / vnd da hantieren vnd gewinnen / Die ir nicht wiß-
set / was morgen sein würd. **D**en was ist ewer leben : Ein
dampff ist der ein kleine zeit weret / vñ darnach verget / Da
für das ir sagen soltet / Leben wir vñ wils gott / so wellen wir
dis oder dz thun. Nu aber rümet ir eüch in ewerm hochmüt.

Auch hat gott solch vermessenheit des künfftigen vñnd
gottes vnachtung / an mer orten verdampft / Als Luce. 12. da
der reiche man vil getreide des jars hatte / das er seine scheit-
ren wolt abbrechen vñ grösser bawen vnd seine güter dahin
thun / vnd sprach zu seiner seel / Liebe se / du hast vil güts vff
vil jar / is vnd trinck vnd sey güts müts / **A**ber gott sprach zu
im / Du narr / Dise nacht würt man drin sele von dir fodern
vnd wes würt sein / das du gesamlet hast : **S**o gehets allen /

die nicht in got reich seind. Also antwortet er auch Act. 1. den
jüngern / Es steht euch nicht zu / zu wissen zeit vnnnd stunde /
die der vatter in seiner gewalt hat. Vnd Prover. 27. Rühme
dich nicht auff den morgend tag / den du weist nicht / was sich
noch heutte begeben mag. Darumb er auch jm vatter vnser
vns hat nicht mer den vmbt tägliche brot / heutt zu gebē / heis-
sen bitten / Auff das wir mit fürchten leben vnd handeln sol-
len / Vnd wissen / dz wir kein stund sicher seien weder lebens
noch güts / sonder alles auß seinen henden gewarten vnd ne-
men / wie den thut ein rechter glaub. Vnd zwar wir sehens
auch täglich an vilen gottes wercken / das also muß zū gon /
wir thūns gern oder vngern.

Salomon hatt fast sein ganzes büch auff solche lere ge-
richt / dz Ecclesiastes heist / Vnd zeigt an / wie allenthalben
der menschen fürnemen vnd vermessenheit / so gar eytel vnd
nichts den mühe vnnnd vnglück ist / wo nicht gott mit darcin
gezogen würt / das man jm fürchte vnnnd laß jm genügen an
dem gegenwertigen / vnd frem sich des selbigen. Den gott ist
der sichern vngläubischen vermessenheit seind / die sein ver-
giffet / darumb handelt er da wider mit allen seine wercken /
laßt vns seyn vnd fallen / reysset leyb vnd güte dahin / wenn
wirs am wenigsten dencken / vnd kompt zū der stund / der wir
vns gar nichts versehen / das die gottlosen / wie der Psalter
sagt / ir leben nimer zur helffte bringen / sonder alle zeit vns
uersehens / vnd wenn sie erst recht anfahrn wöllen / dahin fa-
ren vnd dauon müssen / wie Job auch vil mal saget.

So sprichstu denn / wie sollen den die leute mit einander
handeln / so bürg werden nicht taug : So müste mancher da
hinden bleiben / der sunst wol herfür komen mag. Antwort.
Es seind vier weyse eüsserlich güte Christlich mit andern zū

handlen/wie ich mer gesagt hab. Die erst ist/das man lasse
nemen vnd rauben vnser güt / wie Christus leret Matth. 5.
Wer dir den mantel nimpt dem laß auch den rock / vñ soder
es nicht wider von jm. Dife weys gilt nun nichts vnter den
kauffleüten / man hat solchs auch nit für ein gemeine Christ
liche lere gehalten noch gepredigt / sonder für einen rath vnd
güte meinung für die geistlichen vñ volkomene / welchs doch
weniger halten dann kein kauffman. Aber rechte Christen
haltens / den sye wissen / das ir vatter jm hymmel / hat inen
Matth. 6. gewißlich zugesagt / dz täglich brot heüt zü geben.
Vnd wo man also thette / wurde nit allein so vnzeliche miß
brauch in allen handeln nach bleiben / sonder wurde gar vil
nicht kauffleüt werden / weil vernunfft vñ menschlich natur
solche far vñ schaden auffß aller höhest fleucht vñ schewet

A Die ander ist / Jederman geben vmb sunst der es darff /
wie Christus auch da selbst lert. Dife ist auch ein hoch Christ
lich werck / darumb es nicht vil gilt vnter den leüten / vñ wur
de auch beyde kauffleüt vnd hendel weniger / wo man dz solt
im schwancß haben / den wer das thün sol / müs sich warlich
an den hymel halten vñ jmer dar auff gottes hende / vñ nicht
auff seinen vorrath / oder güt sehen / dz er wisse / gott welle vñ
werde in erneren / ob schon alle winckel ledig weren. Den er
weist dz war ist / wie er zü Josua sagt / Ich wil dich nit lassen
noch die hand abthün. Vñ wie man sagt. Gott hat mer den
er je vergab. Da gehört aber auch ein rechter Christe zü / dz
seltsame thier auff erden / Welt vñ natur acht sein nicht.

A Die dritte ist / leyhen oder borgen / das ich mein güt hyn
gebe / vnd wider neme / so mirs wider bracht würt / vnd empe
ren müs / wo mans nicht wider bringt. Den Christus Lu. 6.
selbst solchs borgen also verfasset vnd spricht. Ir solt leyhen

also / das ir nichts dauon hoffet. Das ist. Ir solt frey dahin leyhen / vnd wagen obs eüch wider werde oder nicht / Würds wider / das mans neme / würds nicht wider / das geschenekt sey. Das also geben vnd borgen / kein vnterscheydt habe nach dem Euangelio / deñ disen / Das geben nichts wider nimpt / Borgen aber wider nimpt wo es kompt / vñ doch wäget / das ein geben sey. Deñ wer also leyhet / dz ers besser oder mer wider nemē will / dz ist ein öffentlicher vñ verdampfer wücher / Syntemal auch die noch nicht Christlich handeln / die also borgen / dz sye widerumb eben dasselb fodern oder hoffen / vñ nicht frey dahin wagen / obs wider kompt oder nicht.

Dis ist ja auch (als ich meine) ein hoch Christlich vñnd seltsam werck / wo man der welt lauff ansihet / Vnd wurde / wo es solt in brauch komē / allerley handel gar gewaltigklich mindern vnd nider legen. Deñ dise drey stück / das gar meyr sterlich halten / das sye nicht auffs künsttliche sich vermessen / noch auff menschen oder sich selbs vertrauen / sonder hangē an gott allein / vnd würd hie alles bar über besalet / vñ fürct das wort mit eyn / Wils gott / so geschichts / wie Jacobus leret. Dañ hie handelt man mit leütten / als mit denen die seylen mögen vnd vngewiß seind / vnd gebt darüber vmb sunst / oder wäget / das verloren sey / was man borget.

Hie würt man sagen / Wer mag deñ selig werden: Vñ wo werden wir Christen finden: Ja mit der weyß würt kein handel auff erden bleiben / wurde ein yegklichen das sein genomē oder abborget werden / vnd den bösen faulstreffigen die thür auffgethan / alles zü nemen / zü betriegen vnd zü liegen / der die welt vol ist. Antwort. Hab ichs doch gesagt / das Christē seltsame leüt seind auff erdē. Darum ist in der welt not / ein streng hart weltlich regimēt / dz die bösen zwingē vñ

dinge/nicht zu nemen noch zu rauben/vnd wider zu geben/
was sie borgen/ obs gleich ein Christe nicht sol wider fodern
noch hoffen/**A**uff das die welt nicht wußt werde / frid vnter
gehe/vnd der leüt handel vñ gemeinschafft gar zu nicht wer
de.**W**elchs alles wurde geschēhē/wo man die welt nach dem
Euangelio regieren solte/vnnd die bösen nicht mitt gefesen
vnd gewalt treyben vnd zwingen/ zu thūn vnnd leyden was
recht ist.**D**arumb muß man straffen reyn halten/frid in stet
ten schaffen/vnd recht in landen handhaben/vñ dz schwert
frisch vnd getrost haben lassen auff die übertretter/wie sant
Paulus Ro. 13. leret.**D**eñ das wil got haben/das den vnchri
sten gesteuert werde/das sie nicht vnrecht/oder on straffe vn
recht thūn.**E**s darff niemant gedenccken / dz die welt on blüt
regiert werde. Es sol vnd muß das weltlich schwerdt rot vnd
blüttrüftig sein/deñ die welt wil vnd muß böß sein/ So ist dz
schwert gottes rüte vnd rache über sye. **D**och dauon hab ich
genüg gesagt/im büchlin von der weltlichen oberkeit.

So were nun das borgen ein fein ding/ wo es vnter den
Christen geschehe/ da wurde ein jeglicher gern widergeben
was er geborget hette/vnd vñ da geleyhet hette/wurde es gern
emperen/wō es ihener nicht künde widergeben.**D**eñ Chri
sten seind brüder/vñ etner leß den andern nicht/ So ist auch
keiner so faul vnd vnuerschampt/das er on arbeit/sich auff
andern gut vnd arbeit verlasse / vnd zeren wölle mit müßig
gang/von eins andern habe. **A**ber wo nicht Christen seind/
da sol die weltliche oberkeit treiben/das der bezale/was er ge
borget hat/**T**reibet sye nicht vnd ist seümitig/sol der Christen
leyden solchē raub/wie Paulus. 1. Cor. 6. spricht/ **W**arumb
leydet ir nicht vil mer vnrecht. **D**en vnchristē aber las man/
manen/fodern vnnd thūn/wie er wil. **E**s ligt an jm nichts/
weyl er ein vnchrist ist/vnd achtet Christus ler nicht.

Auch

Auch hastu noch ein tröstlin / dz du nicht schuldig bist zu leyhen / denn allein das dir übrig ist / vnd zu deiner notturfft kanst emperen / wie Christus vom almüsen spricht / Was eüch übrig ist / das gebt zu almüsen / so ist eüch alles reyn. Wann nu von dir so vil wolt geborget werden / das / wo es nicht wider wurde geben / du verderben müstest / vñ dein notturfft des nicht emperen künd / da bistu nicht schuldig zu leyhen. Deñ du bist am meysten vñnd ersten schuldig / deinem weyb vñnd kind vñnd gesind die notturfft zu schaffen / vñnd müst in dasselb nicht entwenden / das in von dir gebürt. Darumb ist das die beste regel / **V**o dir das borge wil zu groß sein / Das du eben so mehr etwas gebest vmb sunst / oder so vil leyhest / als dich dunckt / das du geben wolest vñnd wagen / obs verloren sein müsse. Deñ Johannes der täuffer sprach nicht / Wer einen rock hat / der gebe den selben weg / Sonder / wer zwen rock hat / der gebe einen dem der keinen hat / Vñd wer speyse hat / der thü auch also.

Die vierde weiß ist / kauffen vñd verkauffen / vñd dz mit bargelt / oder war mit war bezalen. Wer nu diser weiß will brauchen / der schick sich drein / das er wisse sich auff kein zu künfftigs zu verlassen / sonder auff gott allein / vñnd das er müsse mit menschen vmbgen / die seyn oder liegen werden gewislich. Darumb dis der nechste rat ist / Das / wer da verkaufft / niches borge noch bürgen anneme / sonder laß im bar über bezalen. Will er aber leihen / das ers mit den Christen thü / **V**o nicht / das ers wage / das verloren sey / vñd nicht weiter leyhe / deñ er sunst geben wolt / vñd sein notturfft leyden mag / oder wo im weltlich regiment vñ ordnung nicht wider dazu hilfft / das ers lasse verloren sein / Vñd hüte sich / das er für niemandt bürg werde / Gebe vil lieber was er vermag. Das möcht ein rechte Christlicher kauffman sein / den würd

gott auch nicht lassen/weyl er jm also sein trawet/vñ frölich
mit seinem ferlichen nechsten wagt vnd handelē.

Den nu das bürg werden in der welt nicht were/vnd dz
frey Euangelisch leyhen im schwantck gieng/vnnd eytel bar
gelt oder bereytr war in kauffs hendeln giengē / so weren die
aller grösten/schedlichsten fahr vnnd feyl vnnd geprechen in
kauffshendeln schon weg/vñ were leicht mit aller kauffman
schafft vmb zügehen/vnnd möchten auch die andern sündē
lichen gepreche deste bas erweret werden. Den wo solch bürg
werden vnd sicher leyhen nicht were/müste mancher hie ni
den bleiben/vñ sich an messiger narung lassen benügen/der
sich sunst auff borgen vnd bürgen verlost/vnd tag vnd nacht
in die höhe trachtet/Daher den wil jederman kauffman vñ
reich werden. Daraus denn folgen müssen solch vnzeliche/
schwinde/böse griff vnd tück / die jert vnder den kauffleuten
zü zeiten gehen / das ich schon daran verzeyffelt habe/das
gang solt gebessert werden/Sonder es hat sich also überlade
mit aller bosheit vnd triegerēy/das sich selbst die lēge nicht
tragen kan/vnd durch sich selbst in jm selbst fallen müs.

Hie mit wil ich kürzlich abgeweyset vñ vnterricht geben
haben jederman / in disem grossen wüsten / weitleuffigem
handel des kauffmanschafft. Den wo man solt lassen gehn
vnd bleiben / dz ein jeglicher sein war so theür verkaufft als
er möcht/Vnd das borgen vnd vnfrey leyhen vnd bürg wer
den recht were/Vnd doch radt vñ lere gebē/wie man Chri
stlich hierinne faren/vnnd güt sicher gewissen behalten solte/
Das were eben so vil/als wolt man raten vnd leren/ wie vn
recht solt recht sein/wie böses sol güt sein / vnd wie zü gleich/
nach götlicher schrifft vnd wider götliche schrifft / möcht ge
lebt vnd gehandelt werden. Den dise drey feyle/das ein ject

sicher das sein gibt wie theür er will/ item borgen/ vnnnd bürg
werden / seind wie drey burnquelle / darauß alle greuel/ vnz
recht/ list vnnnd tück / so weyt vnd breyt fließt. Das man nu
dem flüssen nach trachten wolt zu weren/ vnd wolt die burn
quell nicht stopffen/ da ist mühe vnd arbeit verloren.

Darumb will ich alhie etliche solcher tück vnd böse stück
so ich selbs vermerckt/ vnnnd durch frumme gute herren mir
seind angezeigt / erzelen / daran man spüren vnnnd mercken
künde/ wie dise mein oben geschriben grund vnd spruch auff
gericht werden vnd gehn müssen/ sol anders den gewissen in
kauffs hendeln geraten vñ geholffen sein. Auch dz man alle
andere böse stück auß disen erkennen vñ abmessen müge/ die
hie nit erzelt werde/ Den wie solts möglich sein/ dz man sye
alle erzeler: Syntemal/ durch die vorgesagte drey burnquel
len/ dem geys vñ der bösen tückische eigennussigē natur/ thür
vnd fenster auffgethan/ lufft vñ raum gemacht/ vrlaub vnd
macht geben ist/ allerley list vñ tück frey zu üben / vñ täglich
mer vñ mer zu erdenckē/ Das es alles von geys stincke/ ja im
geys ersaufft vñ vertaufft ist/ wie mit einer grossen sinisthuf.

Auffs erst machen etliche kein gewissen dauon/ das sye ir
war/ auff borgen vnd zeyt/ theürer verkauffen/ den vmb bar
gelt. Ja etlich wöllen kein war verkauffen vmb bar gelt/ son
der alles auff zeyt/ Vnd das alles darumb/ dz sye ja vil gelts
daran gewinnen. Hie sichstu/ das dis stück gar groblich wi
der gottes wort/ wider vernunfft vnd alle billigkeit/ auß lau
ter freyem mütwillen des geys/ sündigt an seinem nechste/
des schaden er nit acht/ vñ raubt vñ stilet jm dz sein/ vñ sūche
nicht sein zimliche narung / sonder seinen geys vnnnd gewin
allein drinne. Den nach gödlichem rechte/ solt ers nit theürer
borgen oder auff zeyt geben/ den vmb bar gelt.

Item also ist auch das gethan / das etliche ir güt theurer verkauffen / den es auff gemeinem marckt gilt vnd im kauffgeng vñ gebt ist / Vnd steigern also die war auß keiner vrsach den das sie wissen / dz des selbigē gūts keins mer im land ist / oder in fürß keins mer komen würt / vñ man es habe müsse. Das ist ein schalcks aug des geyhs / das nur auffß nechsten notturfft sihet / nicht der selben zū helffen / sonder sich der selben zū bessern / vñ mit seines nechsten schaden reich werden. Das seind alle öffentliche dieb / rauber vnd wücherer.

Item / das etliche ein güt oder wahr / in ein land oder in einer stadt / gang vñnd gar auff kauffen / auff das sye allein solch güt / gang vñnd gar in irer gewalt haben / vñnd darnach sehen / steigern vñnd geben mügen / wie theur sye wöllten oder klünnen. Nun ist daoben gesagt / das die regel falsch vñnd vnchristlich ist / das jemant sein güt so theur gibt als er will vñnd kan. Bil greülicher ist das / das man darauff ein güt allein auffkaufft / welchs auch die Keyserlichen vñ weltlichen recht verbieten / vñnd heissens Monopolia / das seind Eygenmüsigge keuffe / die in landen vñnd stedten gar nicht zū leiden seind / Vñnd Fürsten vñnd Herren solten solchs weren vñnd straffen / weñ sye ir ampt wolten volführen. Den solche kauffleut thun gerad / als weren die Creaturen vñnd güter gottes / allein für sye geschaffen vñnd geben / vñnd alls möchten sye die selben den andern nemen vñnd sehen / nach irem mütwillen.

Vñnd ob yemant wolt anziehen / Josephs exempel Gen. 41. wie der heylig man / alles korn im land einsamlet / vñnd darnach in der theuren zeyt / da durch er kaufft alles gelt / vñnd vñnd land vñnd leüt / dem König in Egypten / welchs je scheint / als sey es auch ein Monopolion oder eige nutz gewest. Hierauff ist die antwort / Das diser kauff vñnd handel Joseph kein mo-

monopolion/sonder ein redlicher gemeiner kauff gewest ist/wie er im land gewonlich war. Denn er weret niemant zur guten zeit einzukauffen. Es war aber sein weisheit von got geben/dz er des Königs Korn/da es die sibben jar wol geriedt/einsamlet/da die andern nichts oder wenig einsamleten. Denn der text spricht nicht/das er allein hab das Korn eingekauft/sonder habe es eingesamlet in stedten des Königs. Haben dz die andern nicht gethan/8 schad sey ir/wie 8 gemein man pflegt on sorg zü zeren/oder auch zü weile nit hat dz er einsamle.

Wie wir auch noch sehen/dz wo nicht Fürsten oder stede sich mit vorradt versehen/gemeinem landt zü güt / da kleibe kein vorradt oder gar wenig bey dem gemeinē man / der sich von ein jar ins ander neret des jährlichen einkomens. Vnd ist doch solch einsamlen kein eigen nutz oder Monopolion/sonder ein recht güt Christlich fürsichtigkeit/ für die gemein vnd andern zü güt. Denn es geschicht nicht also / das sye alles allein zü sich reissen / wie dise kauffleut / Sonder von dem das gemeiner werck oder jährlich einkomē jederman gemein erregt/samlen sye den schatz / dauon andere nicht wöllen oder mügen samlen / sonder nur ir täglich enthaltung dauon nemen. Auch so meldet die schrift nicht / das Joseph darumb habe das Korn eingesamlet / das ers so theür gebe / als er wolt. Denn der text klärlich spricht / Er hats gethan / nit dem geiz zü güt /sonder das landt vnd leüt nicht verderben. Aber der kauffgeiz / gibt so theür er will / vnd sücht seinen nutz allein / vnangesehen / ob land vnd leüt da durch verderben.

Das aber Joseph darüber / hat alles geldt vñ vihe / dazu allen acker vnd leüt / vnder den König bracht / scheint wol nit Christlich gethan / Syntemal er den dürfftigē solt vñ sonst geben / wie das Euangelion vnd Christliche liebe leret. Aber

er hat recht vnd wol gethan / Den Joseph füret das weltlich regiment an Königes stadt.

So hab ich nu offtmals geleret / das man die welt nach dem Euangelio vnd Christlicher liebe / nicht soll noch mag regieren / sonder nach strengen gesetzen / mit schwert vnd gewalt / darumb das die welt böß ist / vnd weder Euangelion noch liebe annympt / sonder nach irem mütwillen thut vnd lebt / wo sye nicht mit gewalt gezwungen würd. **S**onst / wo man eytel liebe solt üben / da wurde jederman wöllen / essen / trincken / wol leben / von der andern güte / vnd niemant arbeyten / **I**a jederman wurde dem andern das sein nemen / **V**nd wurde ein wesen werde / dz niemant vor de and'n lebē künde.

Darumb hat Joseph recht gethan / weyl es gott also schicket / das er vmb einen gleichen zimlichen kauff / den die zeyt gab / alles zu sich bracht / vnd lies weltlichem recht nach / das volck im zwang bleiben / vnd verkauffen sich vnd alles was es hatte / **D**en in den selben landē als zeyt ein streng regiment gewesen ist / vnd der brauch / das man leüt verkaufft / wie ander güte. **D**aneben hatt er on zweyfel als ein Christen frumman / keinen armen lassen hungere sterben / **S**onder wie der tert sagt / nach dem er des Königs weltlich recht vnd regiment hat erhalten / solch korn dem land vnd leütē zu güte vñ nutz eingesamlet / verkaufft vnd außgethan. **D**arumb ist das exempel des trewen Josephs / so fer von der that der vntrewen / eygennütigen kauffleütē / als himel vnd erden von einander seind. **D**as sey zum außlauff vngeserlich geedte. **N**un komen wir wider zu den stucken.

Item / weñ etlich ir monopolia vnd eigennütige ketiffe / sonst nicht vermügen außzurichten / weyl andere da seind / die auch der gleichen war vnd güte haben / faren sye zu vnd

geben ir güt so wol feyl / das die andern nicht mügen zükomen / Vnd zwingen sye damit dahyn / dz sye entweder nicht müssen feyl haben / oder mit irem verderben / so wol feyl gebē als syene. Also komē sye doch zum Monopolion. Dife leitē seind nicht werdt das sye mensche heysen / oder vnter leitē wonen / Ja sye seind nicht werdt / das man sye vnterweyfen oder ermanen solt / Syntemal der neyd vnnnd geys so grob / vnuerschampt hie ist / das er auch mit seinem schaden / ander zū schaden bringt / auff das er ja allein auff dem platz sey. Recht ihet hie weltliche oberkeit / das sye solchen nennen alles was sye hettē / vñ tribē sye zum land auß. Solche stuck weren wol nicht not zū erzelen / Aber ich wil sye darumb mit einge mengt haben / das man sehe / welch grosse bāberoy in kauffs hendeln sey / vñ an den tag kome für jederman / wie es zū get in der welt / sich vor solchem ferliche standt wissen zū hūten.

Item / das ist auch ein feins / Wenn einer eim andern verkaufft mit worten im sack / die war die er selbst nit hat. Nemlich also / Es kompt ein frembder kauffman zū mir vñ fragt ob ich solche oder solche war feyl habe / Ich sprech ja / vnd hab doch keine / Vnd verkauffe jm doch die selbige vñ. x. oder. xj. gulden / die man sunst vmb. ix. oder neher kaufft / vñ sage jm zū / über zwen oder drey tag die selbige zū überreichē. In des gehe ich hin vnnnd kauff solche war / da ich vorhin wol wuste / ich wurde sye neher kauffen / denn ich sye jm gebe / vnd überreiche jm die selbige / vñ er bezalet mir sye / Vnd handle also mit seinem / des andern eigen gelt vñ güt / on alle fahr / mühe vnd arbeit / vnd werde reich. Das heist fein sich auff der gassen erneret durch frembd gelt vnnnd güt / das man nicht darff über land oder meer ziehen.

Item das heist auch sich auff der gassen nerē / Wenn ein kauffman den beutel vol golds hat / vnnnd nicht mer will mit

seinen gütern über land oder mer obenteür stehen / sonder ge
wissen handel haben / so bleibt er imer in einer grossen kauff
stadt / **V**nd wo er einen kauffman weist / der getrenget würt
von seinen leyhern / das er gelt müß haben zu zalen vnd doch
nicht hat / sonder noch güte war hat / **S**o macht ihener einen
auf von seinen wegen / der disem die war abkauffen sol / vnd
beüt im. viij. gulde / do es sunst gern. x. gilt. **B**il der selb nicht
so macht er einen andern auf / der im sechs oder siben beüt /
Das der arm man sorgen müß / die war wölle abschlagen /
Vnd fro würt / dz er die acht nimpt / auff dz er bar gelt kriegt /
vnd nicht all zu grossen schaden vnnnd schand tragen müsse.
Auch geschichts / das solch benödtige kauffleüt / selbs solch Z
rannen ansuchen vñ die war anbieten / vmb bar gelt willen /
das sye bezalen mügen / **S**o halten sye den hart / bis sye die
war wol feylgnüg kriegen / vnd darnach geben / wie sye wöl
len. **S**olche finantz heist man die gurgel stecher oder keel
stecher / Seind aber für grosse geschickte leüt gehalten.

Item / das ist auch ein groff des eygen nukes / das drey
oder vier kauffleüt haben einerley oder zweyerley war vnter
iren handen / welche ander leüt nicht haben oder nit feyl ha
ben / **W**en sye nu mercken / das solche war wil gelt gelten / vñ
alle tag theürer würt / von kriegs wegen oder vnfalls halben /
So rotten sye sich / vñ geben den andern für / wie solche war
fast gesucht werde / vnnnd nicht vil seind / die der gleichen feyl
haben. **S**eind aber etliche die der gleichen haben / so musen
sye einen frembden auf / den lassen sye alle solche war auff
kauffen. **W**en sye den die selbigen war ganz in iren henden
haben / machen sye einen bund mit einander / auff die weyße.
Wir wölle dise war / weil keine mer fürhanden ist / so vnnnd
so hoch auffss gelt halten. **V**nd welcher sye ncher gibt / der sol
so vil oder so vil verfallen sein.

Dis stuck/höre ich/treibē die Engellender kauff leüt am
 gröbsten vñ meisten/wen̄ sye Englische oder Lindische tüch/
 er verkauffen. Den̄ man sagt/sye haltē einen besondern rat
 zū disem handel/wie ein rath in einer stadt / **V**nd dem rath
 müssen alle die Engellender gehorchen / die Englische oder
 lindische tücher verkauffen/bey genanter straffe. **V**n̄ durch
 solchen rath würt bestympt / wie theür sye ire tücher geben
 sollen/vnd welchen tag oder stund/ sye sollen feyl haben oder
 nicht. **D**er oberst in disem rath heist/der Koyrtmeyster/vnd
 ist nicht vil weniger gehalten den̄ ein fürst. **D**a sihe/was der
 geyß vermag/vnd fürnemen thar.

Item / ich muß das stücklin auch melden. **I**ch verkauff
 einem auff ein halb jar/pfeffer oder des gleichen/**V**n̄ weis/
 das er den selben von stundan muß wider verkauffen / vmb
 bar gelts willen zū machen. **S**o gehe ich selber hin/oder rich
 te es durch andere auß/vnnd laß im den pfeffer vmb bar gelt
 wider abkauffen/ **D**och also/was er mir vff ein halb jar hat
 vmb .xij. gulden abkaufft / das kauff ich im ab vmb .viij. vnd
 der gemein kauff ist .x. gulden. **A**lso kauff ich im vmb zwen
 gulden neher ab / den̄ der gemein marckt gibt/ **V**nnd er hat
 mir vmb zwen gulden höher abkaufft/den̄ gemeiner marckt
 gibt. **S**o gewinne ich hinden vnd forne / **N**ur darumb das
 er gelt kriege/vnnd glauben halte/ er möcht sunst mit schan
 den bestehen/das im niemant mer borgete.

Welcher nu solche finance treibt oder treiben muß / wie
 denen geschicht/die mer auff borg kauffen / denn sye bezahlen
 mügen/ als wen̄ einer kaum zwen hundert gulden vermag/
 vnd fürret einen handel/auff fünff oder sechs hundert gulden
Wen̄ nu meine schuldiger nicht zalen / so kan ich auch nicht
 zalen/**S**o frist der vnradt weyter ein/vnd kompt ein verlust

D

auff die ander / je mer ich dise finantz treibe / bis ich mercke /
Es wölle an galgen ich müsse entlauffen oder im thurn sitzen.
So schweyge ich stille / vñnd gebe meinen Borgern güte
wort / Ich wölle sye redlich bezalen. In des gehe ich hin / vñnd
neme noch so vil gütter auff borg als ich kan / vñnd mache die
selbige zu gelt / oder neme sunst gelt auff wechsel / oder entley-
he so vil / wie ichs bekommen kan.

Weiß mirs den am gelegensten ist / oder mein borger mir
nicht rüg lassen / So sperre ich mein hauß zu / Stee auff / vñ
lauff dauon / Versteck mich jergent / in ein kloster / da ich frey
biß / wie ein dieb vñnd mörder auff ein Kirchhoff. Da wer-
den den meine Borger fro / das ich nicht gar auß dem lande
lauffe / vñnd schelten mich quidit den. ij. oder. iij. pfennig aller
meiner schuld / vñnd das ich das hynderstellig in. ij. oder drey
jaren bezalen soll / Des geben sye mir brieff vñnd sigel / So
kom ich wider in mein hauß / vñnd biß ein kauffman / der mit
seinem auffstehn vñnd lauffen zwey oder drey tausent gulden
gewonnē hat / die ich sonst in drey oder vier joren / weder mit
rennen noch traben hette mügen erlangen.

Oder wo dis nit helffen wil / wo ich sehe dz ich entlauffen
müß / So ziehe ich an des keyfers hoff / oder zu seinen stathal-
tern. Do kan ich vmb. j. oder. ij. hundert gulde ein Quinquar-
nell kriegē / dz ist / Keyserlichen brieff vñ sigel / das ich mag. ij.
oder. iij. jar frey sein / gen vñ stehn für alle meinen borgern /
darumb dz ich grossen schadē gelittē haben sol nach meinem
angebē / dz die Quinquernelle auch ein nasen hab / als gieng
es göttlich vñnd recht zu / Das heissen aber bäben stuck.

Item ein ander stücklin / das in den geselschafften geng
ist. Es lege ein Burger sechs jar lang zu ein kauffman ein /
zwey tausent gulden / da mit sol der kauffman handeln / ge-

Winnen oder verlieren / vnd dem burger sárlich zwey hundert gulde gewisser zins dauon geben / Was er aber darüber gewinnet / ist sein / Gewinnet er aber nichts / muß er doch die zins geben. Vnd der burger thút dem kauffman grossen dienst daran / Denn der kauffman meinet mit zwey tausent / wol drey hundert zú gewinnen. Biderumb thút der kauffman dem burger einen grossen dienst daran / denn sein gelt müste sunst still ligen / vnd kein gewinn bringen. Wie dis gemein stúcklin vnrecht sey vnd ein rechter wücher / hab ich im Sermon vom wücher gnügsam erzelt.

Noch eins muß ich erzelen zum exempel / wie das falsche borgen vnd leyhen in vnglück füret. Es seind etlich / weñ sy mercken / das der kauffer vngewis ist / vnd seine zeyt nit helt / die konnen sich selbs sein bezalen / auff die weyß. Ich richte einen frembden kauffman zú / das er hüngehe / vnd ihenent seine war abkauffe / Es sey hundert gulden oder des gleichen vnd spricht / Weñ du seine war hast alle abkaufft / so sage im bar gelt zú / oder weyse in auff einen gewissen schuldiger. Vnd weñ du die war hast / so füre in zú mir / als zú dement schuldiger / vnd thú als wüstu nicht / das er mir schuldig ist / So werde ich bezalen vnd gebe im nichts. Das heist sinanzen / vnd den armen man in grundt verderben / mitt allen den er villeicht auch schuldig ist. Aber so soll es gehen / wo man vnchristlich borget vnd leyhet.

Item man hat auch gelernet / Sin war oder gút zú sehen oder zú legen / da es zúnympt / als pfeffer / ingber / saffran / in feuchte gewelb oder keller / das am gewichte schwerer werde. Also auch wullen gewand / seyden / marder / zobeltn / in finstern gewelben oder kreime feyl zú haben / vnd die lufft verstopffen / wie der brauch aller halbe ist / dz man schier zú einer

secklicher war weist ein besondere luste zu mache. Auch kein war ist/man weist eine besondern fortenl drauff/ Es sey mit messen/zelen/mit elen/maß oder gewicht. Vnd das man ir ein farb mache/die sye von ir selbst nicht hat. Oder man legt das hübsche vnden vnd oben/vnd das ergest mitten in/ Also das solche eriegeren kein ende hat / vnnnd kein kauffman dem andern weiter trawen thar/ denn er sihet vnd greiffe.

Au ist bey den kauffleuten ein grosse klag/über die Edel leüt oder rauber / wie sye mit grosser fahr müssen handeln/ vnd werden darüber gefangen / geschlagen/geschetzt vnd be raubt. Wenn sye aber solchs vmb der gerechtigkeit willen leyden/so weren freylich die kauffleüt heylige leüt/die solchs leyden. Wie wol es sein mag / das etwa cinem vor gott vn recht geschehe / das er der andern entgelten müß / in welcher rott er funden würd / vnd bezalen/ was ein ander gesündigt hat. Aber weil solch groß vnrecht vnd vnchristliche dieberey vnnnd rauberey über die ganze welt durch die kauffleüt/auch selbst vntereinander geschicht. Was ists wunder / ob Gott schafft/dz solch groß güte mit vnrecht gewonnen / widerumb verloren oder geraubt würd / vñ sie selbst dazü über die köpff geschlagen oder gefangē werden: Gott müß je dz recht hanz haben/Wie er sich einen rechten richter rümen leß Psal. 10.

Nicht dz ich damit die straffen rauber oder strauch dieb wil entschuldigt oder vrlaub geben haben / irer rauberey zu treiben. Es ist der lands fürsten schuld / die ir straffen solten rein halte/dem bösen eben so wol zu güte/ als dem frummen. Vnd den Fürsten gepürt solche vnrechte kauffs hendel / mit ordentlicher gewalt zu straffen vnd zu weren das ir vnterthanen nicht so schentlich von den kauffleuten geschunden worden. Weyl sye dz nicht thun / so braucht gott der Heüter vnd

ReiBer / vnd krafft durch sye / das vnrecht an den Kauffleu-
ten / vñ müssen seine teuffel sein / gleich wie er Egypten land
vnd alle welt mit Teuffeln plagt / oder mit feynnden verder-
bet. Also steubt er einen hüben mit dem andern. On dz er da
durch zü verstehen gibt / das die reüter geringer reüBer send /
den die kauffleüt. Syntemal die kauffleüt täglich die ganze
welt rauben / wo ein reütter im jar ein mal oder zwey / einen
oder zwen beraubt.

Von den gesellschaften solt ich wol vil sagē / Aber es ist
alles grundlos vñ bodenlos / mit eytel geiz vnd vnrecht /
Das nichts dran zü finden ist / das mit gutem gewissen zü
handeln sey. Den wer ist so grob / der nicht sihet / wie die ge-
sellschaft nicht anders seind / den eytel rechte Monopoliaz
Welche auch die weltliche heydnische rechte verbietē / als ein
offentlich schädlich ding aller welt / ich wil des götliche rechts
vnd Christliche geses schweigen. Den sye habē alle war vñ
ter iren henden / vnd machens damit wie sye wöllen / vnd trei-
ben on alle schew die obberürten stuck / das sye steigern oder
nidrigen nach irem gefallen / vnd drucken vnd verderben alle
geringe kauffleüt / gleich wie der hecht die kleine fisch im was-
ser / gerad als weren sye Herren über gottes Creaturen / vnd
frey von allen gesesen des glaubens vnd der liebe.

Daher kompts / das man in aller welt müß die würtz so
theür kauffen / als sye wöllen / vnd treiben den wechsel / Heür
steigern sye den jngber / Ober ein jar den saffran / oder wi-
derumb / Das se alle zejt die krümme in die beuge come / vñ
kein verlust / schaden noch far leyden dürffen / Sonder ver-
dirbt oder feylet der jngber / so erholen sye sichs am saffran /
vñnd widerumb / auff das sye ires gewinnes gewis bleiben /
Welchs wider die art vñnd natur ist / nicht allein der kauffs

güter/sonder aller zeitlicher güter/die got wil vnter der fahr
vnd vnſicherheit haben. **A**ber ſie habens funden vnd troffen
d̄z ſye durch fertliche/vnſichere/zeitliche war/ſichern/gewiſſ
ſen vnd ewigen gewinſt treyben. **A**ber darüber müß gleich
wol alle welt ganz auß gezogen werden/vnd alles gelt inn
iren ſchlauch ſencken vnd ſchwemmen.

Wie ſolt das jimmer mügen götlich vnd recht zugehen/
das ein man in ſo kurzer zeit ſo reych werde / das er König
vñ keyſer außkauffen möchte? **A**ber weil ſye es dahin bracht
haben/das alle welt in fahr vnd verluſt müß handeln/Heir
gewinnen/über ein jar verlieren/**A**ber ſye jimmer vnd ewig
klich gewinnen/vñ ire verluſt mit erſteygertem gewinn büß
ſen können / iſts nicht wunder/ das ſye bald aller welt gut zu
ſich reiſſen. **D**enn ein ewiger gewiſſer pfennig/iſt ja beſſer/
denn ein zeitlicher vngewiſſer gulde. **N**u kauffſel. **L**agen je
ſolche geſelſchafftten/mit eitel ewigen gewiſſen gulden/vmb
vnſere zeitliche/vngewiſſe pfennig. **V**nd ſolt noch wunder
ſein/das ſye zu Könige vnd wir zu betler werden?

König vnd Fürſten ſolten hye drein ſehen / vnd nach ge
ſtrengem recht ſolchs weren / **A**ber ich höre / ſye haben kopff
vñ teyl daran/**V**nd geet nach dem ſpruch Eſa. 1. **D**eine für
ſten ſeind der diebe geſellē worden. **D**ie weyl laſſen ſye diebe
hengen/die ein gulden oder halben geſtolen haben/ vnd han
tieren mit denen/die alle welt berauben/vnd ſtolen ſerer/deß
alle ander / **D**as ja das ſpruchwort war bleibe / **G**roſſe diebe
hengen die kleinen diebe / **V**nd wie der Römisch Rathherr
Lato ſprach / **S**chlechte diebe ligen in thürnen vnd ſtöcken/
Aber öffentliche dieb gend in goldt vnd ſeyden. **D**as würt
aber zu leiſt gott dazū ſage: **E**r würt thün wie er durch **E**ze
chiel ſpricht/ Fürſten vnd Kauffleut/ einen dieb mit dem an

16.
dern ineinander schmelzen wie bley vnd erz / gleich als wenn
ein stadt außbrennet / das weder Fürsten noch kauffleut mer
seien / als ich besorge / das schon vor der thür sey. Wir gedenc
en vns doch nicht zu bessern / wie groß auch die sünd vnd vn
recht sey / So kan er auch vnrecht vngestraft nicht lassen.

Darumb darff niemant frage / wie er müge mit gutem
gewissen in den gesellschaften sein. Kein ander rath ist / Den
Las abe / Da würt nicht anders auß. Sollen die gesellschaften
bleyben / so muß recht vñ redligkeit vntergen / Soll recht
vnd redligkeit bleibe / so müssen die gesellschaften vntergan.
Das bette ist zu eng / spricht Esaias / eins muß her auß falle /
Vnd die decke ist zu schmal / kan beyde nicht zu decken. Nun
weis ich wol / das mein schreiben übel gefallen würt / vñ wer
den villeicht alles in wind schlagen / vñ bleiben wie sye seind
Aber ich binn doch entschuldigt / vnd hab das mein gethan /
auff das man sehe / wenn gott nu mit der rütten komen würt /
wie redlich wirs verdienet haben. Hette ich ein sele damit
vnterricht / vñ erlöset von dem schuld / so hette ich nicht vmb
sonst gearbeytet.

Wie wol ich hoffe / es sey durch sich selbst so hoch vñnd
schwerer worden / wie ich daoben auch gesagt habe / das sich
selbst nicht lenger tragen würt / vnd man zu leyst dauon muß
ablassen. Summa / Ein jeglicher sehe vff sich. Wir zu lieb
oder dienst darff niemant solchs lassen Also darffs auch mir
zu trus vnd leide niemant an nemen noch behalten. Es gilt
dir / nicht mir. Gott erleuchte vns / vnd stercke vns / seincn gut
ten willen zu thun / **WEN.**

Wom wucher.

Zum ersten / Ist zu wissen / dz zu vnsern zeit welche der

**De vsurd:
Senore.**

Apostel S. Paul verkündet hat / das sye ferlich sein werden /
der geys vnd wücher / nicht allein gewaltlich in aller welt
eingerissen / sonder auch sich vnterstanden hat / etlich schand
deckel zü süchen / darunder er für billich geachtet / seine böß
heit frey möchte treiben. **Vñ** ist darüber fast dahin komen /
das wir dz heylig Euangelion für nicht achten. **Der**halb
es not ist / einem jeglichen menschen in diser ferlichen zeyt /
sich wol für sehen / vñnd in den hendeln zeytlicher güter mit
rechtem vntersheyde wandeln / mit fleissigem auffmercken
des heyligen Euangelij Christi vnser herrn.

Zum andern / Ist zü wissen / das drey vnterscheidliche
grad vnd orden seind / wol vñ verdienstlich handeln / mit den
zeytlichen gütern. **Der** erst / So vns jemant etwas zeytlich
er güter nimpt mitt gewalt / sollen wirs nicht allein leyden
vñnd faren lassen / sonder auch bereyt sein / so er mer nemen
wolt / dasselb auch zü lassen. **Dauon** sagt vnser lieber herr
Jesus Christus Matth. 5. **So** jemant mit dir hadern will /
für gericht / das er dir deinen rock neme / dem laß auch deinen
mantel dar zü. **Dis** ist der höchst grad / in disem werck / vñ ist
nicht zü verstehn / als etlich meinen / man soll in den mantel
hinnach zum rock werffen / sonder dz man den mantel auch
lasse faren / nicht wider strebe noch vngedultig drob sey / noch
wider hole / **Den** er spricht nit / gib jm auch den mantel / son
der laß jm auch den mantel / **Gleich** wie Christus vor dem
Bischoff Annas / da er den backenschlag empfieng / hielt er
den andern / auch den selben / wider dar / vñnd bereyt war mer
zü leyden der selben schlege. **Ja** in seinem gansen leyden / se
hen wir / das er nye kein böß wort oder that bezalet oder wi
derholet / sonder allzeit bereit ist mer zü leyden.

Zum dritten / Das ist wol war / das er zü dem knecht
Malchus

1A.

Malchus/der in schlag sprach/ Hab ich übel geredt/so bewe-
re dasselb/hab ich aber wol geredt/warumb schlechtstu mich?
In dise wort stossen sich eilich/auch der gelerten/vñ meinen
Christus hab hie nicht den andern backen dar gehalten/wie
er gelert hat. Aber sye sehen die wort nit recht an/ Den Chri-
stus in disen Worten drowet nichts/rechet sich nicht/schlechte
nicht wider/wegert auch nicht den andern backen/ja er rich-
tet auch nicht/noch verdampft den Malchus/sonder wie
Petrus von jm schreibt/Er hat nicht gedrawet/noch böses
gedacht wider zu gelten/sonder hatt es auff gott den rechten
richter gestellet/als sprech er/Hab ich recht geredt/oder du
mich rechte schlechtst/würt gott wol finden/Vnd du bist schul-
dig das zu beweren/Gleich wie Zacharias sprach/da sye in
tödien/Videat dominus et iudicet/Gott würt das sehen vñ
richten. Also thet er auch vor Pilato/da er sprach/Der mich
dir übergebē hat/der hat ein grössere sünd than dan du. Den
das ist ein Christliche brüderliche trewe/so du in erschreckest/
vnd jm sein vnrecht vnd gottes gericht fürhietest/der dir vn-
recht thüt/vñ bist jm schuldig zu sage also/Wolan du nimst
mir den rock/dis vnd das/thüstu recht daran/du wirfts müs-
sen verantwurten. Vnd das müstu thun/nicht vmb deins
schadens willen fürnemlich/auch nicht in zu bedrawen/son-
der in zu warnen/vnd seins verderbens zu erinnern/So er-
sich nicht daran keret/so las gen was gen wil/vnd imer mer
nemen. **S**ihe/so ist zu versten das wort Christi/vor Annas
gericht gesprochen/Darnach folget/das du auch müst wie
Christus am creüz/für in bitten/vnd jm wol thun/der dir
übel thüt/das wir jes lassen anstehn bis zu seiner zeyt.

Zum vierden/**P**il meinen/diser erst grad/sey nicht ge-
botten noch not zu halten einem jegklichen Christen mensch-
en. Sonder sey ein guter rath den vollkommen heim geben/ob

ſye in wöllen halten / gleich wie die jancetfratwſchafft vñnd
keuſcheit geraten vñnd nicht gebotten iſt. Darumb achten ſye
für billich / das ein jeglicher das ſein wider hole / gewalt mit
gewalt vertreibe / wie er mag vñnd weiſ / Vñnd ſchmucke ſolch
ir meinung mitt hübschen blümen / bewerer die mitt vilen
krefftigen (als ſye dunckt) vñnd ſachen. Zum erſten / das auch er
lich geiſtlich recht (ſchweig dz weltlich) ſagen / *Dim vi pel-
lere iura ſinunt* / Das iſt / die rechte gebens zü / das man ge-
walt mit gewalt were . Daher zum andn kompt dz gemein
ſprichwort von der not were / das die ſelb vnſtrefflich iſt / was
ſye verwürckt. Zum dritten / füret man her zü etlich exempel
der ſchrift / als Abraham / Dauid vñnd vil mer / die wir leſen
wie ſye ire feynd geſtrafft vñnd bezalet haben. Zum vierden /
ziehen ſye an die vernunfft / vñnd ſprechen / *Solue iſtud*. So
das ein gebott were / wurd den böſwilligen vñnd laub geben zü
nemen vñnd ſtelen / zü letſt wurde niemant nichts behalten / ja
niemandt ſeins leybs ſicher ſein. Zum fünfften / das je alles
feſt bewaret ſey / füren ſye S. Augustinus ſpruch herein / der
diſe wort Chriſti alſo auflegt / dz man den mantel ſoll faren
laſſen nach dem rock / *ſecundum preparationem animi* / Dz
iſt / man ſol dar zü bereit ſein im herzen. Diſe edle / klare auß-
legung / deutten vñnd finſtern ſye mit einer andern gloß / vñnd
ſezen dar zü / Es ſey nicht not / das wir es zü geben / eüſſerlich
in der that / Sey gnüg / dz im herzen innerlich wir bereit vñnd
geſchickt ſein / ſolchs zü thün / alſo ſolte wir etwz wölle thün
das wir doch nit wöllen thün / das ja vñnd nein ſey ein ding.

Zum fünfften / **Sihe da** / das ſeind die meiſter ſtuck / das
mit man biſher / vnſers lieben herren Jeſu Chriſti leer vñnd
exempel mit dem heyligen Euangelio / allen ſeine martern
vñnd heyligen hat umbferet / vnbeſant gemacht vñnd ganz vn-
terdrückt / das nu zur zeyt geiſtlich vñnd weltlich prelaten vñnd

unterthänen / die besten Christen seind / die solchen stücken folgen / vnd wider Christus leben / lere vnd Euangelion streben. **D**aher kompt es / das hader / gezenck / richter / notarien / officialen / iuristen vnd solchs edlen gefinds so vil seind / als die fliegen im summer. Da her kompt so vil krieg vnd blüt vergiessen vnter den Christen / da müß man auch gen Rom hadern. **D**eñ da selbst ist vil gelts die aller größte not. **B**ü in der Christenheit jent das gröst / heyligst / gemeinst werck ist / rechten vnd fechten. **D**as ist / dem heyligen fridlichem leben vnd leren Christi widerstreben / vnd zu letzt dz grausam spil dahin bracht ist / dz nit allein vmb geringer summa wille / drey oder vier groschen / ein arm Christe mensch / den gott mit seinem blüt erlöset / citiere etwa über vil meylen / verbanet / verziagt würt / von weyb / kind vñ den seinen / sond auch die frisch en knabe / dz achten als gar wol gethan / vñ ein fröliche stirn darzü tragen. **S**o solle fallen / die gottes gebot zu spot mache so sol gott blende vñ schenden / die sein heyliges liechtes wort zur finsternuß machen. **D**z heist / *Vim vi repellere licet / vñ / scdm animi preparationem / den mantel faren lassen.* **D**eñ also halte auch das Euangelion die Heyden / ja die wölff vñ alle vnuernünfftige thier / vñ dürffte sein die christe nit mer.

Zum Sechsten. **D**erhalben will ich das mein thun / vnd so vil ich mag / einen jeden verwarnt haben / das er sich nicht lasse irren / wie gelert / wie gewaltig / wie geistlich / vñ wie vil & selben alsampt seind / die auß disem grad / ein rath gemache haben vnd noch machen / es geschehe mit welcherley blümen vñ farbe es mag. **E**s hilfft kein außrede / es ist schlecht ein gebot / dem wir schuldig seind zu folgen / wie Christus vñ seine heylige in irem lebē vns dasselb bestetiget / vñ fürtrage habē / gott achtet nit / das die rechte / sye seien geistlich oder weltlich / zu lassen / gewalt mit gewalt weren. **A**uch ist nicht köstlich

was die recht zülaffen/ Lassen sye doch zü / gemeine frawen
heüßer/die doch wider gottes gebott seind/laffen auch vil an-
dere böse stuck zü/die got verbeit/sye müssen auch heymliche
sünd vñ böshheit zülaffen. **E**s ist gar ein klein ding/was men-
schliche recht gebieten vñ verbieten/schweyge/das sye zü las-
sen oder nicht straffen. Darum/die notwere/ist wol vor dem
menschlichen recht vnsträfflich/aber vor gott nicht verdienst-
lich. Haderu vor gericht strafft weder Pappst noch Keyser/
Is strafft aber Christus vnd seine lere. Das aber etliche vät-
ter im alten Testament / ire seind haben gestrafft/ist nie ge-
schehen auß irem wilkore / oder on sonderlich befehl gottes/
welcher die sündler strafft/zü weilen durch frumm vnd böse/
engel vñ menschen. Darumb haben sye nicht darinn ir rath
oder güte gesucht / sonder allein gott gehorsamlich gedient/
gleich wie Christus im Euangelio leret/ das man vmb got-
tes gebots willen/auch wider vatter vnd müter handeln sol/
die er doch gebotten hat zü eren / vnd doch die gebot nicht wi-
dereinander seind/sonder das vnter/nach dem öbern regiert
würrt. Also auch/wen dir gott gebett/dich zü rechne oder ver-
fechten/so soltu es thun vnd nicht ehe.

Zum Sibenden. **D**och ist es war/das gott hat eingesezt
das weltlich schwert/darzü auch die geistliche gewalt der kir-
chen/vñ beiden oberkeitē befolhen/die böshwilligē zü straffen
vnd die verdrukten zü redten/Wie Paulus Ro. 13. vñ vil
örtern leret Isa. 1. vnd Psal. 81. **A**ber das solt also geschehen
das niemant selbst klegger were / sonder die andern in brüder-
liche trew vnd sorgfeltigkeit für einander/ ansagten der ober-
keit/diser vnschuld / vñ ihener vnrecht/das also die gewalt
mit füg vñ rechter ordnung durch der andern bezeugen/zur
straff greiffe. Ja der leydende solt bitten vnd weren/dz man
seine sach nicht rechete/Widerumb die andern nicht ablassen

bis das übel gestrafft wurde/so gienge es freütlich/Christlich vnd brüderlich zu/vnd wurde mer die sünd/ den der schaden angesehen. Darumb strafft Paulus die Corinthern. 1. Cor. 6. das sye recheten mit einander/vñ nicht lieber schaden vnd betrug litten/wie wol er irer vnuolkomenheit zu lieb/dz sye richter setten/die geringsten vnter in/ Das thet er aber sye zu beschemen/das sye ire vnuolkomenheit erkenten. Also muß man auch noch dulden/die vmb zeitlich gut rechten vñ sechten/als die weichen kindischen Christen die man nicht hyn werffen muß/vmb hoffnung willen irer besserung/wie der selb Apostel/an vil orten leret. Aber man sol in sagen/dz dasselb nicht Christlich noch verdienstlich wol than sey/sonder ein menschlich vnd irdisch werck/verhinderlich zur seligkeit mer denn fürderlich.

Zum achten. Solch gebot/hat Christus darumb geben/das er in vns auffrichtet/ein fridlich/reyn vnd hymelisch leben. Nun ist das nicht der weg zum friden/so jederman das sein wider fodert/vnd nicht vnrechts leyden wil/als die blinden meinen/von den am. 13. Psal. steet. Sye wissen den weg nicht zum friden/welcher allein im leidē geet/Wie auch die heyden mit vernunft vnd wir mit täglicher erfahrung erkennen. Es muß ein teyl dem andern still halten vnd leyden/sol frid bleiben/vñ ob man lang zancet vñ hadert/muß es doch zu leetz auff hören/mit vilen erlitten schaden vñ übel/die nit geschehen/so man im anfang dis gebot Christi gehalten/vñ sich die anfechtung (da mit got vns versücht) nicht het lassen von dem gebot treyben vnd überwinden. Also ordnet es gott das/wer nicht wenig wil lassen faren vmb seins gebots willen/der muß vil oder gar verlieren/durch hader vñnd krieg/vnd ist billich/das der den Richtern/Procurator/Schreibern gebe on allen danck/ins Zeüffels dienst. xx. xxx. xl. gul

den / der seinem nechsten / nicht nach lies vmb gottes willen
vnd ewiges verdienst / zehen oder sechs gulde / auff dz er also
verliere beyde / zeytliche vnd ewige güter / der do möcht / so er
gott gehorsam were / gnüg / zeytlich vñ ewiglich haben. **S**o
soll es auch sein / das grosse herren zu weylen ein gang land
verfriegem / vnd groß **S**ummen mitt den kriegs leüten vmb
bringen / vmb eins kleinen nuss oder freyheit willen / **D**as
heißt der welt verkehrte weyßheit / die mit gulden negen fischet
da die kost größer ist / deñ der gewin / vñ seind / die das wenig
gewinnen vnd das vile verthün.

Zum netinden / **A**lso auch were es vnmöglich / das wir
möchten rein werden / von der anlebung der zeitliche güter /
weñ gott nicht verordnet / das wir mit vnrecht beleydigt / vnd
da durch geübt wurden / vnser herz ab zu wenden / von den
zeytlichen falschen gütern der welt / die selben mit Friden fa-
ren lassen / vñnd hoffen in die vnstichtlichen ewigen güter.
Darumb wer das sein wider fodert / vnd den mantel niche
nach dem rock auch faren leßt / der widersteht seiner eigē rey-
nigkeit vñnd hoffnung zur ewigen seligkeit / zu welcher gott
in durch solch gebot vnd vnrecht leyden / wil üben vñ treiben.
Vnd ist nicht zu besorgen / ob vns schon alles genommen wur-
de / das vns gott verlasse / vñ auch nicht zeytlich versorge / wie
im 36. Psalm steet. Ich bin jung gewesen vnd bin alt wor-
den / vnd habe nie gesehen / das der gerecht verlassen sey / oder
seine kind nach brot geen / **A**ls deñ auch in **J**ob beweyset ist /
dem vil mer geben ist hernach / deñ er hat vorhin / ob es wol
im alles genommen ward. **D**eñ kurz vmb / solch gebot wöllen
vns lösen von der welt / vñ begirig machen des himels / **D**ar-
umb solt man den trewen rath gottes Fridlich vñ frölich auff-
nehmen / **D**eñ wo er das nicht thet / vnd vns nicht lies vnrecht
vnd vnfrid widerfaren / möcht sich dz menschlich herz nicht

erhalten / es verwickelt vnd verklebet sich zü tieff / in den zeitlichen dingen darauß den folget / überdruß vnd vnachtsamkeit der ewigen gütter im hymel.

Zum zehenden. Das ist gesagt von dem ersten grad / zü handeln in zeitlichen gütern / der auch der fürnemst vñ grösst ist / vnd leider nicht allein der geringst / sonder auch zü nicht worden / ganz vnbelant / vor den neblen vñ wolcken menschlicher rechten / sitten vñ gewonheiten. Nun folget der ander grad / Der ist / dz wir solle gebē frey vmb sunst jederman / der sein bedarff oder begert / Davon sagt vnser herr Jesus Christus auch Mat. 5. Wer von dir bittet / dem gib / Vñ wie wol diser grad vil geringer ist den der erst / ist er doch schwer vnd bitter / denen / die mer schmecken die zeitliche den die ewigen gütter / Den sye haben nit souil vertrauen in gott / das er sye erneren müge oder wölle / in disem ellenden leben. Darumb sorgen sye / sye sterben hungers vñ verterbē ganz / so sye nach gottes gebot solten geben jederman der sye bittet. Vñnd wie mügen sye jm trawen / dz er sye in ewigkeit ernere ? Den als Christus sagt / Wer gott in einem kleinen nicht vertrawet / der vertrawet jm nit in mer in einem grossen / dennocht gen sye hin vñnd meinen / gott sol sye ewig selig machen / achrens auch dafür / sye haben desselben zü jm ein güte vertrauen / vñ wölten doch diser seiner gebot nit achten / da mit er sye üben vnd treiben will / das sye lernen jm vertrawen / in zeitlichen vnd ewigen dingen. Darumb zü besorge ist / wer nit wil die lere hören / vnd folgen / der würt der kunst nimer überkomen vnd wie sye in kleine zeitlichen gütern gott nit vertrawen / zü leist auch müssen verzweyffen / in den grossen vñ ewigen.

Zum Fylffte. Diser ander grad ist so gering / dz er auch dem schlechten vnuolkumen volck der juden im alten Testament geboten ist / wie Deute. 15. geschriben steet / Es werden

alzeit arme leüt sein in deinem land/ darumb gebeüt ich dir/
das du dein hand auff thüest deinem armen vnd dürfftigen
brüder/ vnd gebest jm. Darzü hat er in dasselb so hart gebot
ten/ dz sye niemant müsten betteln lassen/ vñ spricht Deute.
15. Es soll je kein bettler noch darbloser vnter eüch sein. So
nun gott das im alten Testament hat gebotten/ wie vil mer
sollen wir Christen / nicht allein darzü verbunden sein/ das
wir keinen darben noch betteln lassen/ sonder auch über das/
den ersten grad halten / bereit sein alles faren zü lassen/ was
man mit gewalt vns nemen wil. Nu ist aber des bettens so
vil/ das auch ein ere darauß worden ist/ vnd nicht gnüg dran
das weltliche menschen betten/ ist auch in der geistlichen prie
sterstand/ als ein kostlich ding getribē. Ich wil mit niemant
drob fechten / ich achts aber / es solt billicher sein / das in der
Christenheit im newen Testament kein betlerey were/ denn
vnter der Jüdenschaft im alten Testament/ Vnd halt/ die
geistlich vñ weltlich oberkeit solten in irem ampt billich han
deln/ so sye alle bettelseck abtheren.

Zum zwölfften. Disem grad steen wider dreyerley stuck
oder prauch vnter den menschen. Der erst ist/ das etliche wol
geben vnd schencken iren freunden / den reichen vnd gewal
tigen/ die sein nicht bedürffen/ mit vergessen der dürfftigen/
Vnd weiß sye also gunst / genies oder freundschaft der selbē
erlangen/ oder von in als frum leüt gelobet werden/ geen sye
hin sicher/ in solchen der mensche/ lob/ eer / gunst oder genies
benügt/ sehen die weyl nicht drauff / wie gar vil besser were/
sye theren solchs den dürfftigen/ in welchen sye gottes gunst/
lob vñ eer erlangeten. Von denē sagt Christus Lu. 14. Wenn
du ein mittags ob abentmal machest / so soltu nit ladē deine
freund / noch deine brüder / noch deine schwegger / noch deine
nachbawren / noch die reichen / auff das sye dich nicht wider
taden

laden/vñ nemst damit deinen lon. **S**onder weiß du ein mal machst/ so lade die armen/ die francken/ die lammen/ die blinden/ so bistu selig/ daß sye mügens dir nicht vergelten/ **E**s sol dir aber vergolten werden vnter den rechtfertigen / weiß sye von den todten auff erstehen. **D**ñ wie wol dise lere so klar ist vnd gemein/ das jederman wol sieht vnd weiß / es solt also sein/ noch sieht man der selben niergent ein exempel mer vnter den Christen / vnd ist doch des ladens/ wol lebens/ essens/ trinckens/ gebens/ schenckens/ kein mas noch zal/ vnd heißen dennoch alle frum leüt vnd Christen/ damit nicht mer außgerichte würt/ daß des gebens dem dürfftigē vergessen. **D** wie greülich gericht/ würt über die selben sichere geyst fallē/ weiß am jüngsten tag gefragt würt/ welchen sye geben vnd wolt han haben.

Zum dreyzehenden. **D**er ander prauch ist/ das man sich dis geben wegert/ der feynde oder widersächer halben / **D**añ die falsche natur schwere dazu ist/ das sye denen wolthätē/ die ir übel than haben. **A**ber es hilfft nicht/ das gebot ist gemein für alle menschen gesagt / **G**ib wer dich bittet. **V**nd **Luce. 6.** klar außgedruckt ist/ **E**in jeglichen der dich bittet/ dem gib. **S**ye würt nicht außgezogē der feynd oder wideryart/ **s**a mit eingezogen/ als daselben der herz sich verkleeret vnd spricht/ **W**eiß ir allein die liebet die eüch lieben / was ist das für ein wolthat: **L**ieben doch die bösen auch ire liebhaber. **V**nd weiß ir nur den wolthätē die eüch liebe / was ist dz für ein wolthat: **t**hün doch das auch die bösen / **I**r aber solt lieb haben ewere feynd/ ir solt güt thün/ ir solt in leihen/ vnd nichts daron gewarten/ so würt ewer verdienst groß sein / vnd ir werdet kind sein des allerhöchsten / **D**añ er ist gütig über die vndanckbaren vnd bösen. **D**ise heylsame gebot Christi/ seind auch also abgangen / das man sye nicht allein nicht helt / sonder

auch ein rhad darauß mache/das man nicht nödlich schuldig
sey zü halte/gleich wie den erste grad. Darzü habe geholffen
die schedliche lerer die do sage/es sey nicht not/dz man signa
rancoris/das ist/die zeichen vnd saure ernste geberden/ ablez
ge gegen dem feynde/sonder sey genüg/dz im herzen im ver
geben werde/vnd ziehen so das gebot Christi von den eüßers
lichen wercken/allein in die gedancke/so er es doch selbst mit
klaren worten ins werck außstreckt/sagend/ ir solt wol thün
(nicht allein wol gedencke) ewern feynnden. Also auch Pau
lus Ro. 13. mit dem König Salomon einhellig spricht/hun
geret deinen feynd/so speyß in /dürst in/so trenck in. Deñ da
mit wirstu auff sein haupt samlen feürrige kolen. Das ist/du
wirft in mit wolthat überladen/dz er mitt güt überwunden/
dich zü liebe engündet würt. Auß disen falsche lere/ist komē
dz sprichwort/Ich wils im vergeben/ich wils aber nicht ver
gessen. Nicht also lieber Christē mensch/ Es müß vergēbe
rñ vergessen sein/wie du wilt/dz gott dir nicht allein verge
be vnd vergesse/sonder auch mer deñ vorhin wolthue.

Zum Bierzehenden / Ist der dritte brauch ein hübsche
güende farb/die disem geben am aller schedlichstē ist/da
von ferlich zü reden ist / deñ es die trifft / die ander leüt leren
vnd regieren sollen/welche das volck seind/das von anbegin
de welt bis ans ende/alzeit die warheit nit mag hören/noch
lesen/das andere hören. Es geet nu also zü/das sye den ho
her tittel/der do heist Almüsen/ oder vmb gotes willen gebē/
reiben allein auff Kirchen/Elöster/Epellen/Altar/Türn
spellen/orgeln/taffelt/bilde/silbern vnd gulden kleinat/vñ
ewnde/dornach auff mess/vigiliē/singen/lesen / testamēt
süßur z/brüderschafften vnd der gleichen. Hie hat das gebē
eingeren. da geet nun der recht strom her/da hat man
in auch her gelehret vnd haben wolt / Derhalben auch nicht

wunder ist / das auff der seitten do Christus sein wort hin ley-
 tet / so durr vnd wüst ist / das wo man hundert altar oder vis-
 gilden hat / nicht einen findet / der einen tisch vol armer leute
 speiset / oder funst armē hauff sessen gebe. Was Christus ge-
 boten hat / dz heist nicht vmb gottes willē geben / sonder was
 menschē haben erfunden. Was man lebendige gliedmassen
 Christi den dürfftigen gibt / dz ist nicht almüsen / sonder was
 man zu stein / holz vnd farben gibt. Vnd ist dasselb geben so
 löstlich vñ edel worden / das gott selber nicht gnüg ist dasselb
 zu vergelten / sonder müß zu hülff haben / brieff / bullen / per-
 gamen / bley / blech / schnür / klein vnd groß / wachs / grien / gelb
 vnd weis / Gleists nicht / so gilt nicht / vñnd alles mit grosser
 kost vmb gottes willē erkauft auß Rom / das je solche grosse
 werck mit Ablass / hie vñnd dort / über gottes lon wol belonnet
 werden. Über das man armē / dürfftige gibt / nach Christus
 gebot / das ellend werck müß solcher prechtlicher belonung be-
 raubt / nur an gottes lon im gnüge lassen. Derhalbē es auch
 en hindern / vñd ihenes herfür gesetzt würt / vñd beyde gegen
 einander / gar vngleich leuchten vñ scheinen. Darumb müß
 auch nun S. Peter von Rom zu seiner Kirchen baw / in der
 gansen welt betteln geen / vñd das almüsen vmb gottes wil-
 len mit grossen hauffen samlen / vñnd mit Ablass theur vñd
 reichlich bezalen. Vñnd das selb werck zympt im auch wol /
 vñ kan sein wol gewarten / die weyl er tod ist / deñ da er lebt /
 müß er Christus gebot predigē / vñ künd des ablass nit gewar-
 ten. Dem selbē getrewen hirten / folgen seine schäffin fleissig
 nach / vñ mit ablass im land irz faren / Das wo ein kirchwey
 oder jarmarck ist / sich die selben bettler samlen / wie die flie-
 gen im summer / die allesampt ein liedlin predigē / Gebt zum
 neuen baw / das eüch gott vergelt / vñd der heylig herr Sane-
 Niclas / darnach zum bier od weyn / auch vñ gottes willen /

vnd die Commissarien reich gemacht vom ablas auch vmb
gottes willen/ Dürfftigen zu geben nach gottes gebot/ seind
weder Commissarien noch botschafften not bey vns.

Zum Fünffzehenden. Was wollen wir hie zu sagen?
Verwerffen wir dise werck/ so verbant vns der heylig Stül
zu Rom/ vnd schelten vns die hochgelerten gar schwind für
Kecher/ den es groß daran gelegē ist/ wo der geltstrom hin ge-
füret würt. Nu wir wollen nicht verwerffen/ das man zim-
liche kirchen bawe vnd schmucke/ der wir nicht emperen mü-
gen/ vnd gottes dienst billich auffz zierlichst gehalten wurd.
Aber doch solt ein maß da sein/ vñ mer geachtet werden/ das
es reinlich den löstlich were/ was zu gotes dienst verordnet
würt. Das ist aber zu erbarmen vnd klagen/ das wir durch
solch gepley vnd wesen/ werden von gottes gebot abkeret/ vñ
allein auff die ding gefüret/ die gott nit gebotten hat/ vnd on
welche gottes gebot wol kan gehalten werden. Es were gnüg/
das man das weniger teyl gebe zu kirchen vñ der gleichen/
vñ den rechten strom geen ließe/ zu dem gebot gottes/ auff
das die wolthat vnter den Christen gegē den armen/ größer
vnd mer leuchtet/ den alle steinen oder hülken kirchen. Vnd
weñ wirs fechtlich sagen sollen/ so ist es ein lauter triegerey/
ferlich vnd versüßlich den einfeltigen/ so man bullen/ brieff/
sigel/ fanen vñ der gleichen auff henckt/ vmb der todten stey-
nern kirchen willen/ vnd thut dasselb nicht hundert mal mer
vmb der dürfftigen lebendigen Christen willen. Darumb
mensch sehe dich für/ got würt dich nit fragen am sterben vñ
züngsten tag/ wie vil du zu testamenten hinder dir lassst/ ob
du souil oder souil zu kirchen geben hast/ sonder würt also sa-
gen/ Ich bin hungerig gewesen/ vnd ir hat mich nit gespen-
set/ Ich bin bloß gewesen/ vnd ir hat mich nit gekleydet/ Die
wort las dir lieber mensch zu herren gen/ da würt an ligen/

ob du deinem nechsten habest geben vnd wol than. Hüt dich vor scheinen/gleiffen/farben/die dich dauon ziehen.

Zum Sechzehenden/ Solche vnräglich leste vnd auff ses abzühn solten Päpst / Bischöff / König / Fürsten vnd herren arbeiten/das/entweder durch ire eigen befehl/oder in einem gemeinen Concilio/ gefest wurde vnd verordnet/das ein jeglich stadt vnd fleck / ir kirchen baweten/vnd ire arme leit selb versorgeten/das der bettel gar ab gieng/oder je nicht also zü ginge/ das ein jeglich fleck seine kirchen oder armen in allen andern stedten erbettelt/wie jetzt der vnlustig prauch ist/vnnd solt den heyligen Stül zü Rom mit seinen Bullen zü friden lassen / der wol anders zü schaffen hat/wo er seins ampts pflegen wil/den bullen verkauffen/vn kirchen bawen/der jm auch seins not ist/Deñ also hat gott nêlich in seinem gesatz auch außgedruckt Deut. am fünffzehenden/ Es werden alzeit armen sein in deiner stadt / das er einer jeglichen stadt/ire armen befolhen hat/vnd dz lauffen hin vn her auff den bettel sack/wie jetzt zü S. Jacob vn gen Rom geschicht/nicht haben will. Wie wol aber ich geringer bin/den das ich Päpsten vnd allen regenten der welt rath geben müg/ in solchem fal/Auch selb wol acht/es werde nichts drauß/dennoch müß man wissen/was gut vnnd not were/vnnd die oberkeit schuldig ist zü gedencen vn thun/ was dem gemeinen volck das in befolhen ist/auffs best zü regieren not sey.

Zum Sibenzehenden/ Hat man ein stücklin funden/dz meisterlich leret/wie wir solch gebot mügen vmbgehen/vnd den heylige geist betriegen/Nemlich/ Es sey niemant schuldig den dürfftige zü geben/ sye seind den in der höchsten not/ Darzû haben sye in fürbehalten/zü dörtern vnd beschliessen/was die höchste not sey. Also lernē wir/nie mant geben noch helffen/bis das sye hunger sterben/erfrieren/versterben/vor

armüt oder schuld entlauffen / **A**ber die schalckhafftige glos
vnd verfürischer zúfas / legt man mit einem wort nider / **D**z
laut also / **W**as du wilt dz dir ein ander thü / dz thü du auch /
Niemant aber ist so nerisch / das er jm nicht ee geben haben
wölt / es gee jm denn jert die seel auß / oder sey vor schuld ent
lauffen / vnd den helffen lasse / wens nimer helffen mag. **W**o
es aber gilt zú kirche / stift / ablas vñ andern dingen / die gott
nicht gebotten hat / **D**a ist niemant so scharff sinnig noch so
fleissig / auß zú rechnen / ob der kirchen eer zú gebē sey / die zie
gel fallen den vom dach / die balcken verfaulen / das gewelb
fall ein / die gnad brieff verwesen oder ablas verterbe / dz doch
alles bas möcht warten / den die dürfftigen / **S**onder hie ist
alle stund die höchste not / ob schon alle lasten vnd boden voll
seind vnd alles wol erbawet. **I**a hie müß man sches an auff
hören samlen / nicht den dürfftigen auff erden zú geben oder
leihen / sonder dem heyligen **E**rcñs / vnser lieben **F**rawen /
dem heyligen patron **S**. **P**eter / die im hymel seind. **V**nd dz
alles nicht mit schlechter fürsichtigkeit / **A**uff das / ob ie der
jüngst tag nimmer mer keme / die kirche versorgt bleibe über
hundert vnd aber hundert tausent jar / **D**omit man zur not
einen heyligē erheben oder **B**ischoffs mentel oder des gleich
en ein jarmarckt auß **R**om kauffen müge. **B**ñ fürwar ache
ich die **R**ömer fast grosse narren / das sye der heyligen erhes
bung / **B**ischoffs mentel / bullen vnd brieff / nicht theurer ver
kauffen / vñ mer gelts lösen / die weil solch feiste **Z**eutsche nar
ren auff ire jarmarckt komen / vnd sich selbst dar zú nötigen /
so doch fürwar kein **E**ndeckrist billicher solch sches der erden
erhebe solt / den der **R**ömisch bodenloser sack / dahin sye auch
alle gesamlet vnd verordnet werden. **E**s were mir auch leyd
im herzen / das solch verdampt güt den dürfftigen enkogen /
den es billich eygent / anders würt angelegt / den für **R**ömi

sche war. S. Ambrosius vnd Paulinus vorzeiten schmeltete die kelsch vnd alles was die kirchen hetten/vnd gabens den armen. Wende umb das blat/so findestu/wie es jeh geet. Vnd wol dir liebes Rom/ob schon den Teütschen geprech am gelt so haben sye doch kelsch/monstranken vnnnd büder gnüg/die seind noch alle dein.

Zum Achzehenden. Nu komen wir zü dem dritten grad die zeitliche gütter zü handeln. Der ist/das wir willig vnd gern leyhen oder borgen sollen/on allen auffsatz vnd zinse. Davon sagt vnser herr Jesus Christus Matt. 5. Vnd wer von dir entleyhen oder borgen will/von dem lere dich nicht/Das ist/versages jm nicht. Diser grad ist der aller geringste vñ ist auch im alten Testament geboten/do gott sagt Deut. 15. So jeman auß deinet brüdern in deiner stadt arm würt/soltu dein herr nicht gegen jm verherten/noch dein hand zü halten/sonder solt sye auffthün vnd jm leyhen/alles wes er bedarff. Vnd disen grad haben sye lassen bleiben ein gepot/Den alle lerer hie züsamen stimmen/das leyhen oder borgen/sol geschehen frey/on allen auffsatz vnd beschwerung/Wie wol vileicht nicht alle eins seind/welchen wir leyhen sollen. Denn wie im vorigen grad/von dem geben ist gesagt/also seind auch hie vil menschen/die den reiche oder güten freunden gerne leyhen/mer darumb/das sye gunst süchen oder in verwandt seind/den das gott gebotten hat/vnnnd sonderlich/so d' hohe Titel da her geet/davon gesagt ist/zü gottes dienst vnd umb gottes willen. Denn dem heyligen Creutz/vnnnd vnser lieben Frawen/vnnnd dem heyligen Patron/leyhet jederman gern/Aber da gottes gebot hin weyset/da ist mü vñ arbeit/da wil niemandt leyhen/es kome dan aber die höchste not/das leyhen nimmer nutz sey wie daoben gesagt ist.

Zum Neunzehenden. Christus aber hat in seinem gebot niemant außgeschlossen / Ja er hat eingeschlossen aller ley personen / auch die feynde / da er sprichet Lu. 6. Wenn ir nur denen leyhet / von welchen ir wartet / das sye eüch wider gebē / was ist das für ein wolthät Leyhen doch die bösen sündler eüner dem andern / das sye gleych desselbē mügen wider haben. **Item /** Ir solt leyhen / vnd nichts da für gewarten. Ist mir wol bewust / das fast vil Doctores / dise wort dahin ziehen / als hette Christus darin gebottē also zū leyhen / das niemant nichts auffsetz oder gewins dran sücht / sonder frey hin leyhen sol / Die meinung wol nicht vnrecht ist / deñ wer also leyhet / das er auffsetz / der leyhet nicht / so verlaufft er auch nit / darumb müß es ein wücher sein / Die weil leyhen von art vñ natur nicht anders ist / deñ etwas für einē andern dar streckē vmb sonst / mit bedingen / dasselb oder des gleich messigen vñ nicht mer / über weyl wider zū nemen. **Über so** wir dem wort Christi recht vnter augē sehen / so lert er nicht leyhen / on auffsak / deñ das ist nicht not zū leren. Syntemal kein ander leyhen ist / deñ on auffsak / oder ists mit auffsak / so ists nicht leyhen. **Er wil /** da wir leyhen sollen / nicht allein den freunden / reichen / vnd da wir geneigt hin seind / die vns widerumb mügen in dem / oder in einem andern leyhen oder wolthün / sonder auch denen / die dasselb nicht vermögen oder nicht wölle / als den dürfftigen vnd feynden / gleich wie er lieben vñ geben lert / also auch leyhen / dz es alles an gesüch vñ an eygen nutz geschehe / Welchs nicht geschicht / wir thün es deñ den feyndē vnd dürfftigen / Deñ sein ganzer red geen dahin / das er vns wil leren / jederman wolthün / Das ist / nicht allein denē / die vns wolthün / sonder auch die vns übel thün / oder nicht wider mügen wolthün. Das meinet er weñ er sagt / Ir solt leyhen / vñ nichts dauon gewarten / Das ist / ir solt leyhen denen die eüch

die eüch nit wider leyhen mügen oder wöllen. **W**er aber leyhet/der gewartet se wider dasselbē das er leyhet / Vnd solt er nichts gewarten/wie sye es verstehen/so were es gegeben/vñ nicht gelyhen. **D**ie weyl es denn so gering ist/das einer dem andern leyhet/der jm freüntlich / reych oder sunst im gleichē wider nusslich sein mag / das auch die sündler die nicht Christus sein/dasselb thun/ so sollen die Christen mer thun/vnd denen leyhen die dasselb nicht thun/dz ist den dürfftigen vnd feynnden. **V**nd da felt abermal zū boden die lere/die do sagt/man sey nicht schuldig signa rancoris ab zulegen/ wie daoben gesagt ist. **V**nd ob sye wol von dem leyhen recht sagen / so machen sye doch ein rhad auß disem gebot/vñ leren vns/wir sein nicht schuldig den feynnden zū leyhen/ noch den dürfftigen/sye sein denn in der höchsten not/ **D**a hüt dich vor.

Zum zwenziasten. **D**arauf folget/dz die allesampt wächerer sind/die weyn/korn/gelt/vñ was des ist/ irem nechste also leyhen / das sye übers jar oder benante zeyt die selben zū zinsen ver pflichten/oder doch beschweren vnd überladen/dz sye mer oder ein anders wider geben müssen / das besser ist/denn sye geborget haben. **V**nd das dise menschē selbs greiffen müge/wie vnrecht sye thun/wie wol es leyder gemein worden ist/sezen wir für ir augen/dreylerley gesetz. **Z**um ersten/dis gegenwertig Euangelion das gebēt/ **W**ir sollen leyen. **N**u ist leyhen nicht leyhen/ es geschehe denn on allen auffsatz vnd einigen forteyl/wie gesagt ist. **V**nd wiewol der tückisch geiz vnterweylen jm selb ein farb anstreicht/ als neme er dz übrig für ein geschenck/so hilffts doch nicht/so das geschenck ein ursach ist des leyhen / oder so der borger lieber nit schenck/wo er möcht frey borgen/ **V**nd besonder ist dz geschenck verdecktig/so der borger dem leyher/ oder der dürfftige/dem habenden schenck / **D**enn es natürlich nicht zū vermüte ist/das

der düeffrige auß freiem willen / dem habenden schencke / son
der die not dringt in. Zum andern / Ist das wider das natür-
lich gesez / Welchs auch der herr Lu. 6. vnd Matth. 6. anzeigt
Was ir wolt das eüch die leüt thün sollen / das thüt auch in.
Nu ist on allen zweiffel niemant / der do wolt / dz jm rocken
auff korn / böse müns auff güte / böse war auff güte war geli-
hen wurde / Ja vil ee wolt ein jeder das jm güte war auff bö-
se / oder je gleich güte on auffsak gelihē wurde / Darumb ist
klar / das solche leyher wider die natur handeln / tödtlich sün-
digen / wücherer seind / vnnnd ired nechsten schaden sūchen in
iren gewinst / das sye doch nicht widerumb wolte leyden von
andern / vnd also vngleich handeln mit irem nechsten. Zum
dritten. Ist auch wider das alt vnd new gesez / dz do gebeüt /
du solt deinen nechsten lieben als dich selbst / Aber solche ley-
her liebē sich allein / sūchen dz ir allein / oder lieben vñ sūchen
noch meinē nit mit solchen trewē ired nechste / als sich selbst.

Zum ein vnd zwenzigsten. Darüb were nicht richtigers
noch kurzer vnterweysung / in disem vnd allen hendeln zeyt-
lichs güts / deñ das ein secklich mensch / so er mit seinem nech-
sten soll handeln / jm fürset dise gebot / Was du wilt das dir
ein ander thet / das thū du jm auch / vñ liebe deinen nechsten
als dich selbst / Da neben bedecht / was er wolt von jm selber
haben / weñ er an seins nechsten stat were / so wurde sichs als
les selbs leren vñ finden / da wurde man keiner recht bücher /
noch richt noch klage dürffen / ja alle sachen wurden schnell
bericht vnd schlecht / Deñ eins jegklichen hertz vnd gewissen
wurde jm sagen / wie er wolt mitt jm gleich gehandelt / nach
gelassen / geben vnd vergeben haben / Darauf er denn müst
schliesen / er sol einem secklichen andern auch so thün. Aber
die weyl wir die selbigen gebot auß den augen sesen / vnd al-
lein den handel vnd sein gewinst oder schaden ansehen / **Sa**

müssen wir so vnzelich vil bücher/recht/richt/hader/blüt vñ
 allen jamer haben / vnd also nach übertretung gottes gebot
 volgen müß / auch zurstörung gottes reichs / Das do ist Frid
 vnd einigkeit in brüderlicher lieb vnd trew. Doch geen solch
 freuel menschen dahin/betten zü weylen vñnd fasten/geben
 zü weylen almüßen/vnd seind hie in disem stuck/ da die selig
 keit anligt/ganz vnachtsam vñnd vn sicher/ als ertreffe sye dis
 gebot gar nichts / on welche sye doch nicht mügen selig werz
 den/ob sye gleich alle andere werck theten aller heyligen.

Zum zwen vnd zwenzigsten. Hie bewegen etliche zwen
 widersprüch / Der erst ist / Weñ es also gethan ist vmbso ley
 hen/so verlüre sich das Interesse/das ist/der nutz den sye die
 weyl möchte schaffen mit der verlihenen war. Der ander ist/
 Das groß exempel/das allenthalben in der welt sitt worden
 ist/auff gewinst zü leyhen / Vnd sonderlich/die weyl die ge
 lerten/priester/geistlichen vnd kirchen also thün/angesehen/
 das der kirchen geystlicher gütter vnd gottes dienst besserung
 darinn gesücht würt/ Anders weren jeh gar wenig Christen
 in der welt/vnd wurde jederman schwer sein zü leyhen. Ane
 wurt. Dis alles ist nichts geredt. Auffs erst/müstu doch das
 interesse vñ die nützung verlieren/west dirs genommen würt/
 oder du jemant gebest vmb sonst/warumb wiltu den in dem
 leyhen das süchen vnd bealten? Denn wer sich gebens vnd
 leihens erweget/der müß sich des interesse züvor erwege/oder
 würt weder geben noch leyhen heissen. Auffs ander. Es sey
 sitte oder vn sitte / so ist es nicht Christlich noch götlich/ noch
 natürlich/vnd hilfft kein exempel da wider/ Weñ es steet ge
 schriben / Du solt nicht folgen dem hauffen böses zü thün/
 Sonder / gott vñnd seine gebott über alle ding eeren. Das
 aber die geystlichen vñnd kirchen das thün / ist souil erger.

Den geistliche güter vnd kirchen / haben nicht gewalt noch
 freyheit / gottes gebot zü reyssen / den nechsten berauben / wü-
 cher treiben vnnnd vnrecht üben / Würt auch gottes dienst da-
 mit nit gebessert / sonder verderbet / Den gottes gebot halten
 das heist gotes dienst bessern / Kirchen güter müge auch wol
 böse büben bessern. Vnnnd wenn die ganze welt mit solchem
 auffsatz zü leyhen einen brauch hette / solten doch die kirchen
 vnd geistlichen da wider handeln / Vnd je geistlicher ire gü-
 ter weren / je Ehrstlicher nach dem gebot Ehrsti / leyhen / ge-
 ben vnd faren lassen. Vnd wer anders thüt / der thüts nicht
 der kirchen / noch geistlichen gütern zur besserung / sonder sei-
 nem wücher süchtigem geys / der sich schmucket vnter solchen
 güten namen. Darumb ist auch nicht wunder / das wenig
 Ehrsten seind / Denn hye sicht man / welche rechter güter
 werck sich üben / ob wol vil sich blendē vñ betriegen mit iren
 eigen erlesenen güten wercken / die in gott nicht gebotten hat.
So aber jemandt auß disem allen sich beschweret / zü leyhen
 seinem nechste / ist ein zeichē seins grossen vnglaubens / dz er
 veracht die trostliche zusagung Ehrsti / do er sagt / Wen wir
 leihē vñ gebē / so seind wir kinder des aller höchsten / vñ vnser
 lon groß / Vñ solcher tröstlicher verheissung ist nit würdig /
 der sye nit glaubt / noch darnach sich mit den werckē richtet.

Das ander teyl

vom wücher.

Zum ersten. Vnter disen dreien graden / seind nu ander
 grad vnd weyß / die zeytliche güter zü handeln / Als Kauffen
 Erben / Bescheiden vnd der gleichen / die mit weltlichem vñ
 geistlichem recht verfasst seind / Durch welche niemant bes-
 ser noch erger würt vor gott. Den das ist kein Ehrstlich ver-
 dienst / so du etwas kauffest / erblich besitzest / ob sonst redlicher

weyß überkomeß / **S**yntemal / auch die heyden / Zärcken vñ
 jüden / der massen frum sein mögen. Aber Christlicher han-
 del vnd wol brauch zeytlicher güter / steet in den dreyen obge-
 sagten gradē oder weysen / Geben vmb sonst / Leihen on auff-
 sag / vñ mit frid faren lassen / was mit gewalt genomē würt.
Ietz lassen wir anstehen alle andre weyse / vñ nemē für vns
 den kauff / nemlich den zins kauff / Darumb / das im selben
 ein hübscher schein vnd gleyssen ist / wie man on sünd ander
 leüt beschweren vnd on sorg oder mühe / reich werden müge /
 Deñ in den andern handeln / ist jederman selbst offenbar /
 wo er zū theür / falsche war / falsch erb / falsch güte gibt oder be-
 sitzt / Aber dis behend vnd new erfunden geschafft / macht sich
 gar offit einen frummen vnd getrewen schus herren / des ver-
 dampfen geys vnd wücher.

Zum andern. **W**ie wol der selb zinskauff nun ist bestet-
 get / als ein zimlicher kauff vnd zügelassener handel / so ist er
 doch heffig vnd seyndselig / auß vilen vrsachen. Zum ersten /
 Das er ein newes behendes erfunden ding ist / sonderlich in
 diser letzten ferlichen zeyt / da kein güts mer erfunden würt /
 vnd aller menschen synn vnd gedancken zaimloß / nur auff
 güte / eer vñ wollust trachte / vñ wir bey den alten / dises kauffs
 kein exempel lesen / **U**nd Paulus dise zeyt auch beschreybt /
 die vil newer böser stuck erfindē werden. Zum andern / Das
 wie sye selb müssen bekennen / wie billich er sey / so hab er doch
 ein böß ansehen vnd ergerliche gestalt / vñnd S. Paulus ge-
 beüt / man sol meyden alle böse ergerliche gestalt / ob sye auch
 sonst an in selbst / billich vñ zimlich were. Ab omni specie ma-
 la abstinete vos. 1. 1. Tessal. vlt. **V**or aller bösen gestalt hütet
 etlich. **N**u ist in disem kauff alzeyt / des kauffers oder zinsher-
 ren vorteyl / größer / besser vnd yederman gefelliger angese-
 hen / deñ des verkäuffers oder zins mans / **D**es anzeichen ist /

dz man noch nie drob gehandelt hat des verkauffers / sonder allein des kauffers halben. Deñ eins jeder gewissen befürchtet / es möcht nicht billich sein zins zu kauffen / So doch niemand dran zweyfelt / das ein jeder das sein vergebe oder verkauffe / wie ferlich er wolt / So gar nahe vnd ferlich geet diser kauffs handel on das gewissen.

Zum dritten. Das es schwerlich mag gesein / das der selb kauff / ob er auch on wücher geschehe / nicht wider das natürlich vñ der Ehrftlichen liebe geseß geschehe. Deñ zu vermüthen ist / das der kauffer nimer oder gar selten / seines nechsten des verkauffers besserung vñnd vorteyl in disem kauff / mer oder so vil süche vnd begere / als sein eigene / sonderlich so der kauffer reicher / vñnd solchs kauffs nicht notdürfftig ist / So doch das natürlich geseß sagt / Was wir vns wöllen vñ gütten / sollen wir auch vnserm nechsten wöllen vñnd gütten. Vnd der liebe art ist / wie .1. Cor. 13. S. Paulus sagt / das sye nicht iren eigē genies noch vorteyl / sonder der andern süchet. Wer will aber glauben / das in disem handel jederman zins kauffe (er sey deñ gar notdürfftig) zu gleicher besserung vñnd vorteyl seins nechsten des verkauffers / als seiner eigen / So es doch zu besorgen ist / der kauffer wolt nicht gern an des verkauffers stat sein / wie im andern kauffen.

Zum vierden. Müß das jederman bekennen / das diser kauff / er sey wücher oder nicht / so thut er doch eben dasselb werck / das der wücher thut. Das ist / das er alle land / stedt / herren / volck beschweret / außsaugt vñnd in verterben bringt / wie wir das sehen offentlich / in vilen stedten vñnd fürstenthümen / welchs kein wücher het möcht volbringen. Du hat der heyr geletert / nicht die frucht auß den baumen / sonder die baum auß den fruchte zu erkennen / So ist mirs vnmöglich / das ich dich sol achte einen süßen feyge baum / weñ du nicht

Anders den scharffe doirn tregst/ Vnd will sich mit mir niche
reymen / das der zins kauff / solcher weys billich sey / dauon
land vnd leüt verterben.

Zum fünfften. Wolan last vns dichten / treümen oder
mit gewalt dencken / diser kauff sey der massen billich / wie er
jest gehet / Dennoch ist er würdig / das Papst / Bischoff /
Keyser / fürsten vnd jederman / darzü thue / das er auffgeha
ben werde / vnd jeglicher schuldig / wer im weren mag / das
ers thue / vomb seiner bösen verdampfen frucht willen / die die
ganze welt beschweren vnd verterben.

Zum sechsten. Darumb ist nicht gnüg / das diser kauff
durch geistlich recht erredet sey vom wücher / denn er ist dar
umb nicht los oder sicher / vom geys vñ eygen nütziger liebe /
Vnd auß dem geystlichen gesetz man findet / das er nicht zur
liebe / sonder zum eigen nutz gezogen würt / Gleich wie dz gelt
auff dem spil gewonnen / ist auch nicht wücher / dennoch ist
nicht on eygen nützig seins selbst liebe vñ on sünde gewon
nen / Vnd der gemeinen frawen lon / ist auch nicht wücher /
doch mit sünden verdienet / Vnd das güt mit flüchen / schwe
ren / oder verprecht erworben ist auch nicht wücher / aber doch
mit sünden erworben. Derhalben ich nicht mag schliessen /
das die zins kauffer recht vnd billich handeln / die seyn nicht
bedürffen. Ja ich frey sage vñnd warne / das die reichen / die
diseo kauffs nicht anders brauchen / den nur zü meren ir zins
vñ güter / vnangesehen / dz andere dadurch beschwert werde /
in grosser far steen / vnd achts auch nicht / dz er den selben sey
zügelassen / wie etliche geizige blasen thun / die auff benante
tag zins auff heben / vnd frisch widerumb dasselb auch auff
zins treiben / das imer ein zins den andern treibe / wie dz was
ser dz mülrad. Welchs so ein offner vñ vnuerschampter geiz
ist / das kein mensch / wie grob er sey / nit leügnē kan / dennoch

hele man dz alles für billich. **V**nd wenn kein ander vsach were / disen zins auff zu achten als einen wücher / oder je als einen vnrechten handel / sonderlich in disem fall / so were doch dise sache gnügsam / dz er solche offenbarliche vnuerschampte geys deckt / vnd sicher handeln leßt / **D**en was auß got ist / das weret den sünden vnd allem bösen / **A**ber diser handel gibe frey dem geys seinen willen / darumb müß er auß gott nicht sein / wie er jetzt im brauch gehet.

Zum sibenden. **N**un wollen wir sehen den grund / durch welchen diser zarter handel wäre gebillich. **E**s ist ein wörtlin / dz heyst auff lateyn interesse / **D**as edle / theur / zart wörtlin / gibt auff teütsch souil / **W**en ich hundert gulden habe / damit ich möcht im handel durch meine mühe vnd sorg ein jar lang / fünff / sechs oder mer gulden erwerben / die thü ich von mir zu einem andern auff ein fruchtbar güte / dz nicht ich / sonder er mag also damit handeln auff dem selbē / **D**rum nim ich von im fünff gulden / die ich het möcht erwerben / vn also verkaufft er mir die zins / fünff gulden für hundert / vnd biß ich kauffer vnd er verkauffer. **H**ie spricht man nun / der zins kauff sey billich / die weil ich het villeicht mer möcht gewinne järlich mit den selben gulden / vnd das interesse sey recht vnd gnügsam / **D**as alles hat so ein hübschen scheyn / das es auff keinen ort jemant tadeln mag. **A**ber das ist auch war / dz ein solch interesse / nit möglich ist auff erden zu habē / **D**arumb das ein ander interesse ist gegen das / welches ist also gethan / **W**en ich hundert gulden hab / vnd damit gewerben sol / mag mir hunderterley jar begegen / dz ich nichts gewinne / ja noch viermal so vil verliere dazü / eben vmb des selbē gelts willen oder für franckheit nit werben mag / oder kein war noch güte vorhanden ist / vnd der fäl vnzelich vil / wie wir sehen / dz der verderben / verlust / schaden / mer seind / denn des gewinnen.

Also

Also ist das interesse des verlieren wol so groß oder grösser/ den das interesse des gewinstes.

Zum achten. Wo nu der zins würde kaufft/ auff dz erste interesse allein / damit solch far vnd müe auß bleiben/ Vnd nimer mer komen mag / dz er mer verliere den er anlegt/ vñ also das gelt/ gerad als möcht es alles vnd alzeyt/ on das ander interesse sein/ angelegt / So istis klar / das der kauff auff nichts gegründet ist / die weyl ein solchs interesse nicht mag sein noch erfunden werden. Den in solchem kauff / findet er alzeyt war für handen/ vñ mag handeln stillsitzend/ krank/ kind/ weyb oder wie vntüchtig er sey/ der keins nit sein mag/ im handel vñ erwerben mit blossen gelt. Derhalbē die auff solch interesse allein sehen vnd handeln/ seind erger den wücherer/ **Ja** sye kauffen das erst interesse / durch das ander interesse/ vnd gewinnen eben da mit/ da mit ander leüt verlieren. **Widerum** / die weyl nicht möglich ist / dz ander interesse zu verfassen/ wirdē vñ gleich achten/ den es nicht in menschē gewalt stehet/ so sehe ich nicht / wie der kauff bestehen müge. Den wer wolt nicht lieber hundert gulden auff zins legen/ den da mit handeln / die weyl er im handel möcht verlieren ein jar zwenzig gulden/ mit der sumen dazu/ Vnd im kauff nicht mer den fünff mag verlieren/ mitt behaltner summen dazu/ **Über dz** / im handel/ müst offte sein gelt still ligē d war oder seins leibs halbē / dz im kauff on vnterlas geet vñ wirbt. Was ist den wunder/ das einer aller welt gut zu sich bringe/ der do bereytschafft der war / vnd täglich sicherheit/ weniger fahr/ mit behüt der haupt summen züuor hat vmb sonst: **Es** müst nicht klein zu tragen die zeyt / dem / der die war alzeyt überkomen mag / Gleich wie sye nicht wenig abtreget/ dem/ der nicht kan der war loß werden oder überkomen. Darumb müß es gar ein vngleich ding sein / gelt auff zynsen/ vnd gelt

im handel/vnnd eins gegen dem andern nicht mag geacheet werden/ Den gelt auff zinsen/hat einen grund/der on vnter las wechset vn̄ tregt auß der erden / on forge der verlust an der hauptsummen. **A**ber gelt im handel hat nichts gewisses/darumb ist hie kein interesse/den̄ zufellig/darauff nichts zu bauen ist. Hie werde sye vileycht sagen / die weyl sye legen gelt auff die grunde / so sey da ein interesse des verlierens/ neben dem interesse des gewinstes / Den̄ darnach der grund bleybt oder nicht/so bleibt oder felt auch der zins. **D**is ist alles war/ dauon wir daunden weiter hören werden. **A**ber das bleybt gleich wol/das ein gelt dz man auff einen grund mag legen/ gar vil zu nimpt an dem erste interesse/ vn̄ abnimpt an dem andern interesse/gegen dem gelt/das im handel webt/ Den̄ wie daoben gesagt/vil mer fahr seind im handel / den̄ auff einem grund. Die weyl den̄ nit mit einem jeglichen gelt man grund überkomen mag/so kan man auch nicht zins vmb ein jegliches gelt kauffen. **D**arumb ist nicht gnüg gesagt/mit souil gelts möcht ich souil zins vff einem grund kauffen/darumb neme ich billich souil zins da für/ vnd laß einen andern für den grund forge/ Den̄ mit der weyse wil man einem jegliche gelt/ einẽ baren grund zu rechnen/dz doch nit möglich ist/vn̄ darauff groß beschwerung der land vn̄ leüt folgẽ muß.

Zum Neunden. **D**arumb ist nit wunder / das die zins juncckern so schwind für andern leüten reich werde/ Den̄ die weyl die andern mitt irem gelt im handel bleiben / seind sye beyden interesse vnterworffen. **A**ber die zins iuncckern/mit solchem sündle / heben sye sich auß dem andern interesse/vn̄ komen in das erst/vnd da muß in vil far abgehen/vnd sicherheit zugehen. **D**arumb solt nicht gestattet werden / da man zins kaufft mit blossem gelt / vnangezengt vnd vnbestympt/ den grund der zins in sonderheit/wie jetzt & brauch ist/vnter

den groffen kauffleuten/ vnd faren dahin/ legen das gelt auff
 einen grund/ in gemein vnd vnernant. **Deñ** da durch geben
 sye der natur vnd art des gelts/ das doch nur sein glück vñ zu
 fal ist. **Es** ist nit die natur des gelts/ dz es einẽ grund kauffe/
 Sonder es mag zufellig einen grund feyl werden auff zinse
 da eilich gelt zu nutz sey / das geschicht aber nit allem grund/
 auch nit allem gelt. **Darumb** sol man den grund nennen vñ
 eygentlich bestymen. **Weiñ** das geschech/ so wurde wol offen-
 bar werden / wie vil gelts müst zinkloß / in dem handel oder
 fasten bleiben/ das zehet zins treybt/ vnd doch kein ander füge
 noch farbe hat / deñ das man in einer gemein hin sagt / **Ich**
 möcht souil zinse da für kauffen auff einem grund / vnd das
 sol interesse heißen. **Ja** lieber/ mein gelt möcht meine nach-
 pauren sein hauß abkauffen / so es aber jm nicht feyl ist/ gilt
 das mügen meins gelts mit seinem interesse nichts/ **Also** ist
 nicht alles gelts glück / das es zins kauffe auff einen grund/
 vñnd wöllen doch auff alles was genühet mag werden/ zins
 kauffen/ das seind wücherer / dieb vnd rauber / **Deñ** sye ver-
 kauffen des gelts glück/ dz nicht ir ist noch in irer gewalt. **Ja**
 sprichstu/ **Es** mag zins auff einen grund kauffen. **Antwort**/
Es thuts aber noch nicht vnd kans villeicht nitmer mer thun.
Hans mag ein Bretten nemen/ **Er** hat sye aber noch nicht/
 so ist er auch noch nicht Eilich. **Dein** gelt mag zins kauffen/
 das ist die helffte geschehen / **Es** ligt aber an andern / das ja
 wort vnd die ander helffte/ **So** nim ich nicht halb für ganz.
Doch wöllen zehet die reiche kauffleut irs gelds glück/ vñ das
 selb eytel on vnglück / darzu andere leüt willen vnd müet ver-
 kauffen / on welchen es leyd / ob sye verkauffen wöllen/ **Das**
 heist die dreyzehenden berenhaut verkaufft.

Zum zehenden. **Weyter** sage ich/ **Ist** nicht gnüg/ das der
 grund bar da sey vñ ernennet werde/ sonder sol klärlich/ stuck

bey stuck angezeigt/ vnd das gelt vnd zins darauß gewisset
werden/ Als nemlich/ das hauß/ der garte/ die wise/ der teych
das sihe/ vnd das alles noch frey/ vnuerkaufft vñ vnbeschwe-
ret/ vñnd nicht der blinden für spilen ins gemein oder ganz/
auff hauffen/ das gut beschweren. Deñ wo dz nit geschicht/
da muß ein stadt oder arm man im sack verkaufft werden/
vnd durch den blinden kauff in grund vererben / wie wir se-
hen jett in vilen grossen stedten vnd herschafften geschehen.
V:sach ist/ Deñ es mag einer stadt abgehen ir handel/ bur-
ger weniger werden/ heüser verbrennen/ äcker/ wisen vñ alle
grund vergehen / vñnd einem jeglichen hauß würt sein gut
vnd sihe weniger werden/ kinder mer werden/ oder sunst mit
vnfal beladen werden/ Vnd schleichen also die güter dahin/
vnd bleib doch der blind kauff/ der auff den ganzen hauffen
in der gemein gemacht ist / Also muß das arm wenige nach
bleibende gut/ tragē des ganzen vorigē volbertigē hauffens/
bürd vnd kost / das mag vnd muß nimer mer recht sein. Da
ist der kauffer seiner zins gewis vnd nicht in der fahr/ welchs
wider die natur eins jeckliche kauffs ist / Welchs nit geschee/
wo außdruckt wurde die stuck bey stuck/ sonder der zins blibe/
für/ webt vñ schwebt gleich mit seinē grunden/ wie recht ist.
Zum eyfften. Vñnd dis ist die einige enthaltung dises
kauffs/ das er nicht ein wüchzer sey/ vnd mer thüt deñ alle in-
teresse/ Das der zins juncker sein zins habe in aller fahr vnd
ire vngewis sey/ als aller andern seiner güter/ Deñ der zins
man mit seinē gut/ ist vnterworffen gottes gewalt/ dem ster-
ben/ francken / wasser / fewer/ lufften/ hagel/ donner/ regen/
wölffen/ thieren / vnd böser menschen manigfeltig beschedig
ung. Dife fahr alle sampt sollen den zins herre betreffen/ deñ
auff solchem vnd nit auff andern grund/ steen seine zins. Es
gebürt jm auch nit ee zins für sein gelt / es sey deñ dz der zins

man oder verkauffer des güts/eigentlich bestimpt/vñ seiner arbeit frey/gesund vnd on hyndernus brauchen müge. Das beweret sich auß der vernunfft/natur vñnd allen rechten/die da eintrechtiglich sagen / das die far des verkaufften dings/stehe bey dem kauffer/ **D**en der verkauffer ist nicht schuldig/dem kauffer seine wahr zu behüten. Also wo ich zins auff einem benannten grund kauff/ so kauff ich nicht den grund/sonder die arbeit vñ müe des zinsmans auff dem grund/ da mit er mir meine zins bringe. **D**arum steet bey mir alle die far/die solch arbeit des zinsmans hindern mügen / so fere sye on sein schult vnd verseümnis geschicht/ es sey durch die elementen/thieren/menschen/franckheiten/oder wie es genent vnd fomen mag / darinne der zinsman so groß interesse hat/ als der zinsherre / **A**lso/ wo jm nach gethanem fleys sein arbeit nicht gelinget/sol er vñ mag sagen zu seinem zinsherre frey/ **D**is jar biñ ich dir nichts schuldig/denn ich hab dir mein arbeit vnd müe/zins zu bringen / auff dem vnd dem güte verkaufft/ das ist mir nicht geraten / der schad ist dein vnd nicht mein / **D**en wiltu ein interesse mit habe zu gewinne / müstu auch ein interesse mit haben zu verlieren / wie das fodert die art eins jegliche kauffs. **V**nd welche zinsherren dz nicht leyden wöllen/ die seind also frum/ als rauber vnd mörder/vñd reißen auß dem armen sein güte vnd narung/ **W**ee jnen.

Zum zwölfften. **D**arauf aber folget / dz der blinde zinskauff/ der nicht auff bar benante stuck vñ stuck eins grounds/sonder in der gemein hin/ auff vil güter in einen hauffen gezogen/gemacht ist/vñrecht ist / **D**en diewepl man nicht kan anzeigen/ auff welche stucke er stehe/so hat er auch kein fahr/vñd nimpt imer hin/es geprech hie oder dort / vñd will seiner zins gewis sein. **S**o sagstu vñlleicht/ **W**en dz ist/wer wil den zins kauffen? **A**ntwurt/ **S**ihe da/ich wisset wol/wo die na

tur solt recht thun / sye wurde sich rämpfen / da brichts herfür
dz im zinskauff würt nur sicherheit / geis vñ wücher gesucht.

¶ Wie vil stede / land / leüt / müssen zinsen / den man len-
gest were schuldig gewesen / gelt nach zü geben. Den wo dise
fahr nit ist im zinskauff / da ist kurz vmb eytel wücher. Nun
geen sye daher / vnd stifften kirchen / klöster / altar / dis vnd dz /
vnd ist des zins kauffens / noch maß noch ende / Gleich als we-
re es möglich / das alle jar / güter / person / glück / frucht / erbeit /
gleich weren / **Es** geratet wie gleich oder vngleich / so müssen
die zins gleich für sich geen. **Soltē** da nit land vñ leüt verder-
ben / **Mich** wundert / dz bey solchem vnmesliche wücher die
welt noch steet. Also hat sich die welt gebessert / **Wz** vor zeitē
hies leyhen / dz ist darnach in einen zinskauff verwandelt.

¶ Zum dreyzehenden. Der selb zinskauff geschicht etwan /
das man denen abkaufft / die wol dürfften / das man in leyete
oder gebe / **So** taug er doch zü grund gar nichts / **Den** gottes
gebot steet im wege / vñnd will / das den dürfftigen geholffen
werde mit leyhen vnd geben. Zum ander mal geschicht er / dz
kauffer vnd verkauffer beyder teyl des iren bedürffen / **Der-**
halben noch leyhen noch gebē vermügen / sonder sich mit des
kauffs wechsel behelffen müssen / **Wen** nun das geschicht on
übertretung des geystlichen geses / das man auffss hundert
4. 5. 6. gulden gibt / lest sichs trage / **Doch** sol alzeit die gottes
forcht sorgfelig sein / das sye mer förchte / sie neme zü vil den
zü wenig / das der geys nicht neben der sicherheit des zimlich
en kauffs eynreisse / ye weniger auffss hundert / je göttlicher
vnd Ehrlicher der kauff ist.

¶ Das ist aber meins wercks nicht / anzüzeigen / wo man
fünff / vier oder sechs auffss hundert geben sol. Ich las es bley-
ben bey dem vrtteyl der rechten // wo der grund so güt vñ reich
ist / das man da sechs nemen müge / **Aber** meins dunckens

acht ichts/ **S**o wir Christus gebot haltē wolten in den ersten
dreyen graden/ solt der zinskauff nit so gemein oder not sein/
Es were deñ in grossen mercklichen summen vnnnd tapffern
gütern. Er reist aber eyn/ in die groschen vnnnd pfennig/ vnd
übet sich hie niden in gar geringen summen/ die man leycht-
lich mitt geben oder leyhen aufrichtet nach Christus gebot/
vnd wil doch nicht geys genent sein.

Zum vierzehenden. Nun finde man etlich/ die nit allein
in geringen gütern/ sonder auch zū vil nemen/ sibē/ acht/
neün/ zehen auffss hundert. Da solten die gewaltigen cynse-
hen/ Hie würt das arm gemein volck heimlich auß gesogen/
vñ schwerlich vnterdruckt. Darumb geschicht auch/ dz solch
rauber vñ wücherer (wie die tyrānē vñ rauber würdig sein)
vil mals/ vnnatürlich sterben vñ des gehenden todts verfal-
len/ oder sonst schrecklich vmbkomē/ Deñ gott ist ein richter/
für die armen dürfftigē/ als er vil mal im alten geses sagt.

Wie faren sye deñ daher vnnnd sagen/ Die Kirchen vnd
geystlichen thū das vnd habens macht/ die weyl solchs gelt
zū gottes dienst gelangt. Fürwar hat man kein andere sacht/
den wücher zū rechtfertigē/ so ist er nie übler gescholtē/ Deñ
er wil je die vnschuldig kirch vnd geystlichkeit mit jm zum teü-
fel führen/ vnd in die sünde ziehen. Thū den namen der kirch-
en ab vnd sprich/ Es thue der wüchersichtige geys/ oder der
faulenser alter Adam/ der nicht gern arbeitert omb sein brot
zū erwerben/ das er seinem müssig gang vnter der kirchen
namen einen deckel mache.

Was gottes dienst du mir? Das heist gott gedienet/ sein
gebot gehalten/ das man niemant stele/ neme/ überseze vnd
des gleichen/ sonder gebe vnnnd leyhe den dürfftigen/ Solch
warhafftig gotts dienst wiltu zerreißen/ auff das du kirchen
bawest/ altar stiftest/ vnd lesen vnd singen lest/ der dir gott

keins geboten hat/vñ also mit deinem gottes dienst/den rech-
ten gottes dienst zu nichte machest. Lasse den gottes dienst für
gehen/den er gebotten hat / vnd kome den hernach mit dem/
den du erwelet hast. **V**nd wie ich daoben gesagt habe / **W**enn
alle welt zehen auffss hundert neme / so solten doch die geyst-
liche stiftte das gestrenngste recht halten / vñnd mit fürchten/
vier oder fünff nemen / **D**en sye sollen leuchten vñnd güt er-
empel geben den weltlichen. **S**o keren sye es vmb/wölle frey-
heit haben/gottes gebot vnd dienst zu lassen/übel zu thun vñ
wücher zu erriben. **W**iltu gott dienen nach deiner weyß/so
diene jm on schaden deines nechsten vnd mitt gottes geboten
erfüllung. **D**en er spricht **I**saie am. 61. Ich bin ein gott der
das gericht lieb hat / vñ bin feynd dem opffer das do geraube
ist. **A**uch spricht der weyß man / **G**ib ein almüsen von dem
das dein ist. **S**olche übersehe aber seind gestole deinem nech-
sten wider gottes gebot.

Zum fünffzehenden. **F**ürcht man aber das den kirchen
vnd stiftten abgee / so die meinung sol für sich gehen. **S**age
ich / **E**s ist besser auß zehen stiftung ein göttliche gemacht/
den vil behalten wider gottes gebot / **W**as hülff dich der gots
dienst/den du hörest er sey wider gott/sein gebot vñnd seinen
dienst: **D**u wirfst einem gott nicht mit zweyen widerspenstia-
gen dienstten dienen / **A**uch nicht zweyen herren dienen.

Auch seind etliche so schlecht einfeltige / das sye solchen
zins on grund vnd vnderpfandt verkauffen/oder se mer ver-
kauffen den 8 grund tregt/da mercklich / verterbe herkompt/
Vnd ist die materi fast ferlich vnd weitleüffig / das schwer-
lich dauon gnügßam mag gesagt werden. **D**as beste were/
dz man sich zu dem **E**uangelio lendete/nehete/ vñ sich übete
in **C**hristlichen hendeln mit gütern/wie gesagt ist.

Auch ist ein ferlich gesüch in disem kauff/des ich besorg/
 niemant oder fast wenig käußer on sünd/ Der ist/dz sye wöl
 len irer zins vnd güts gewiß vnd sicher sein/Vnnd darumb
 gelt von sich thün/dz bey in nicht in der fahr bleybe/Vnd vil
 lieber in ist/das ander leüt damit arbeiten vnd in der gefahr
 steen/das sye die weyl müßig vnd faul sein mügen/vnd doch
 also reich bleiben oder werden. Ist das nicht wücher/so ist er
 im fast ehulich. Kürzlich/es ist wider gott/ Den wo du vor
 teyl an deinem nechsten süchest/den du nicht auch woltest an
 dir im lassen/da ist die liebe auß/vnd das natürlich geses zer
 rissen. **V**u sorg ich/das man in zins käußen gar wenig acht
 wie es dem nechst gedeye/wen nur vnser zins vñ güt sicher
 ist/das man doch in keinen weg nicht süchen sol/Vnd ist ge
 wiß ein anzeigen/des geys oder faulheynt/wie wol der kauff
 darauß nicht erger würt/so ist es doch sünd vor gott.

Aber dahindē in Sachsen vmb Lüneburg vñ Holstein/
 da macht mans recht grob/das nicht wunder ist ob einer den
 andern fresse/Da nimpt man auffß hundert nit allein. ix. x.
 oder wie vil man imer mag/Sonder haben auch ein beson
 ders stücklin daran gehenget. Nemlich/Sol mir einer tau
 sent gulde thün auff zins/so müß ich an statt bars gelts souil
 pferd/küe/speck/korn zē. nemen/des er sonst vileicht nit mag
 loß werden/oder nit so theür verkauffen/das mir kaumet der
 summen die helfft/als fünff hundert gulden bars gelts würt.
 vñ müß doch für tausent gulde zinsen/ob mir schon die war
 vnd vihe nichts nütze/oder kaum auff ein hundert oder zwey
 gulden mag züragen. Ey das seind freylich nit strassen reü
 ber noch stül reüber/sonder hauf reüber vnnd hoff reüber.
 Was sol man da zü sage? Es seind nit leüt/sonder wölff vñ
 vnuernünfftige thier/die nicht glauben/das ein gott sey.

Summa/Allem solchen wücher vñ vnrechten zinsen ist

kein besser rath/ denn das man dem gesetze vnd exempel **Mosi**
volgte/ vnd brecht alle zins widerumb in die ordnung / Das
man den zehende/ oder darnach die not fodert / den neunden
oder achten oder sechsten neme / verkauffte/ stiftte vnd gebe/
So blibe es alles fein gleich / vnd stünde alles in gottes gnad
den vnnnd segen. **Den** wo der zehenden ein jar wol geriete/ so
trüge er vil dem zins herrn/ Gerüte er übel/ so trüge er wenig
Vnd müste also der zins herr die far vnnnd glück eben so wol
tragen/ als der zins man / vnd müsten beyde gott in die henz
de sehen / Da künde man kein benante summa des zins setzen/
were auch nit not / Sonder blibe imer vngewis / wie vil der
zehenden tragen wurde/ vnd were doch der zehenden gewis.

Darumb ist der zehend der aller feinste zins / vnnnd von
anbegin der welt in übung gewest/ vil im alten geses geprey
set vnd bestetiget / als der nach götlichem vnnnd natürlichen
recht der aller billichst ist. **Darnach** hin / wo der zehende nit
reichen wolt noch gnüg were/ künd man den neunde nemen
vnd verkauffen/ oder setzen vnnnd stifften / darnachs ein land
oder hauß vermöcht. **Den** Joseph setz oder fands also/ von
alters her geset vnd gebraucht in Egypten / den fünfften zü
nemen. **Den** hie bleibet noch imer dar/ dz götlich billich recht/
das der zins herr in der far steet/ Serets wol/ so ist der fünffte
güt/ Serets übel/ so ist er deste geringer/ wie es gott gibt/ vnd
hat kein bestimpte gewisse summa.

Nun aber der zins kauff auff bestimpten gewissen sum
men steet/ alle jar gleich zü reichen/ es gerate oder gerate nit/
so muß wol land vil leüt verderben / **Den** er nimpt vil kauffe
vngleiche jar für gleiche jar/ vnd arme jar für reiche jar/ **Da**
er kaufft gottes segen noch nit gegeben / für einen gegebenen/
Das kan vnd mag nimer mer recht sein. **Den** damit saugt
einer dem andern schweys vnd blüt auß. **Darumb** ist kein

wunder/das in disen kurtzē jaren / so lang diser zinskauff im
brauch gewest ist / nemlich bey hundert jaren / alle Fürsten
thumb vnd land verarmet vñ verfest vñ vertorben seind.

Bere aber der kauff oder zins nit auff getreyde gestiftt/
sonder auff heüser oder raum / da man mitt der hand wirbt
vñnd gewinnet / künd man abermal nach dem gesetz Mosi
solchen kauff meystern / Das man dz hall jar in solchen sach
en hielte / vñ nichts ewigklich verkauffte. Den ich achte / weyl
diser handel so vnordig geet / kündt man kein besser exemp
el vnd gesetze nemen / den gottes gesetze / damit er sein volck ver
sehen vñnd regiert hat. Er ist ja wol so weyß als menschen
vernunfft sein kan / vñd dürfften vns nicht schemen / ob man
der Jüden gesetz hierinn hielte vnd folgete / weyl es nutzlich
vñd güt ist.

Hierinnen solten nu Keyser / König / Fürsten vnd herin
wachen / vñnd ir land vñd leüt ansehen / das sye hülffen vñd
rieten / von dem greüliche schlund des wüchers / so hetten sye
es auch deste besser. Das solten die Reichs tage handeln /
als der aller nötigsten sachen eine. So lassen sye solchs
ligen / vñd dienen die weyl des Papysts Tyranny /
land vñd leüt je lenger je mer zü beschweren / bis
das sye mal auch zü scheitern geen müssen /
das sye das land nimer ertragen / son
der außspeyen müsse. Gott gebe
in sein liecht vñd gnade

R M E N.

A 1994607

Faint, illegible text, possibly bleed-through from the reverse side of the page.